

## **Xojon carta-la San Pablo xi kiskii ítjòn-la xita naxandá-la Cristo xi títsajna Corinto**

*Kó tsò Pablo nga síhixat'aà jñà xita naxandá-la  
Cristo xi títsajna Corinto*

<sup>1</sup> An xi 'mì-na Pablo, xi xó k'oas'ín kinokjoà-na nga 'an tsibíxáya-na Cristo Jesús, nga k'oas'ín kjòmejèn-la Nainá. Títsanìhixat'aà-nòjèn kò Sóstenes xi 'ndsee chibá ít'aà ts'e Cristo.

<sup>2</sup> Tikjiì-nò xojon carta jè, jñò xi naxandá-la Cristo màà xi títsajnaà ján Corinto, xi jye kisitsjeè-nò Nainá nga ya títsakjoòkoo Cristo Jesús nga xó k'oas'ín jaàjìin-nò Nainá mé-ne nga xita tsjeè-la komaà kò ngats'ii xita xi xki xi ján chjat'aà-la nga jeya síkijna jè Nà'èn-ná Jesucristo xi otíxoma-ná, tíkoa jè otíxoma-la xita koi. Xi Nà'èn-ná 'mì-lá, tíkoa Nà'èn-ná tsò-la jñà xita koi.

<sup>3</sup> Nainá xi Nà'èn-ná, kò jè Jesucristo xi otíxoma-ná kàtatsjá-nò kjondaà kò kjoa'nchán ya jjiin inima-nò.

*'Én xi kùichja Pablo nga tsjá-la kjondaà Nainá*

<sup>4</sup> Kjit'aà nachrjein tsjaà-la kjondaà Nainá xi ít'aà tsajòn koi kjoa-la jñà kjondaà xi kitsjaà-nò Nainá nga ndaà kisichikon-t'in-nò ít'aà ts'e Cristo Jesús.

<sup>5</sup> Nga yaà ít'aà ts'e Cristo, Nainá kisichikon-t'in yije kjohítsjeèn-la inima-nò, kós'ín nokjoà, kò kós'ín machiya-nò 'én-la Nainá.

<sup>6</sup> Nga k'oaá s'ín 'ya-la, nga jè 'én ndaà-la Nainá xi kjoa ts'e Cristo kjòkixiyaá jjiin inima-nò.

<sup>7</sup> Nímé kjotjò-la Nainá chijat'aà-nò k'e nga tákó titsachiñá-là nga kjoíí ìjngoò k'a Jesucristo xi otíxoma-ná.

<sup>8</sup> Nainá tsjá-nò nga'ño skanda k'e nga kjoehet'aà naxhrjein, mé-ne nga nímé jé sakòt'aà-nò k'e nga kitjojen ìjngoò k'a Jesucristo xi otíxoma-ná.

<sup>9</sup> Nainá xitá kixi-né, síkitasòn-né koni s'ín tsjá 'én-la. Xó k'oaá s'ín kiichja-nò nga ya chraña kitsajnakjòòkoo Jesucristo xi ki'ndí-la tsò-la nga jè otíxoma-ná.

### *Mé-ne kjòjòya-ne naxandá-la Cristo ján Corinto*

<sup>10</sup> Ndí 'ndsè ko tichjaá, it'aà ts'e okixi xi kitsjaà-na Jesucristo xi otíxoma-ná, tìbitsi'bà-nò ngats'ioò, ngàsòn ngáya titsajnakoo xinguioo, mé-ne nga mì kojòya-ne kjohítsjeèn-nò. Tajngoò kjohítsjeèn tikjeén, ngàsòn jchósòn-là nita mé kjoa-ne.

<sup>11</sup> Koií koxan-nò ndí 'ndsè, nga jña xitá ni'ya-la Cloé, tsibénojmí-na nga kjoasií tjín-nò.

<sup>12</sup> Koií k'oas'ín tìxan-nò, tjín i'nga xitá xinguiáá xi tsò: “An, jé Pablo fit'aà-la.” Tjín xi tsò: “An, jè Apolos fit'aà-la.” Tjín xi tsò: “An, jè Cefas [xi tikoá Pedro 'mì] fit'aà-la.” Tjín xi tsò: “An, jè Cristo fit'aà-la.” ¿Mé-ne obixón-nò?

<sup>13</sup> ¿A kjìn ya ma-ne Cristo? ¡Majìn! ¿A jè Pablo xi kisit'aà krò it'aà tsajòn? ¡Majìn! ¿A it'aà ts'eé Pablo komà bautizar? ¡Majìn!

<sup>14</sup> Ndaà chjí-la Nainá, 'an, mìtsà yá xitá kis'iaàn bautizar ya naxandá tsajòn, ta jè Crispo ko Gayo,

15 mé-ne nga mì yá x̄it̄a k̄itso-ne: “It'aà ts'eé Pablo komà bautizar.”

16 Saá t̄íbítsjeèn-na nga t̄ikoā kis'iaàn bautizar Estéfan̄as k̄o x̄it̄a x̄íkj̄ín, t̄anga mìk̄iì b̄ítsjeèn-na tsà kis'iaàn bautizar xi k̄j'eíj̄i x̄it̄a.

17 Jè Cristo mìtsà koi xá kis̄ikasén-na nga x̄it̄a s'iaàn bautizar; koií xá kis̄ikasén-na nga 'an kichj̄àya 'én ndaà-la Nainá. K'e nga chj̄àya, mìtsà 'én-la x̄it̄a chj̄ine s̄ikjeén; maj̄in-na nga chj̄ija nga'ñó-la krò-la Cristo.

*Jè Cristo, nga'ñó-la Nainá-né k̄o kjoachj̄ine-la Nainá-né*

18 J̄ñà 'én xi t̄ínokjoáya it'aà ts'e Cristo nga k'en-t'aà krò, ta kjoā ská ma-la j̄ñà x̄it̄a xi ya t̄j̄imaya ndiyá-la i'nde kjo'in. Tanga j̄ñà xi jye t̄itsabitjokàj̄ñaá kjo'in, k'oaá s'ín mokjeiín-ná nga jè 'én-la Cristo nga'ñó-la Nainá-né.

19 K'oaá s'ín t̄íchj̄a Xojon-la Nainá nga tsò:

J̄ñà x̄it̄a xi 'ñó t̄j̄ín-la kjoā chj̄ine,  
'aán kokoò-la nga ñimé chj̄í-la kjoachj̄ine-la.  
'Aán kochrjeènguia kjo'h̄itsjeèn-la  
j̄ñà x̄it̄a xi 'ñó machj̄ya-la.

20 J̄ñà x̄it̄a xi 'ñó t̄j̄ín-la kjoachj̄ine, k̄o xi 'ñó chj̄ine xojon k̄o xi joóya-ne kjoā xi t̄j̄ín isò'nde, i'nde, ¿ñánda t̄ítsajnak̄o kjoachj̄ine-la? Jè Nainá, kisiskáya-la kjoachj̄ine xi t̄j̄ín-la x̄it̄a isò'nde.

21 Nainá 'ñó x̄it̄a chj̄ine, mìk̄iì kitsjaà'nde-la x̄it̄a nga it'aà ts'e kjoachj̄ine-la isò'nde kijtseèxkon. Nainá k'oaá s'ín sasén-la nga ochrjekàj̄iìn kjo'in j̄ñà xi mokjeiín-la it'aà ts'e 'én ndaà-la Nainá xi kjoā ts'e Cristo, 'én xi tsò-la x̄it̄a koi, kjoā ská-né.

22 Jñà x̄ita judío [mìkiì mokjeiín-la] nga jé xi mejèn-la nga skoe kjo\_xkón xi 'ñó jeya tjín, kò jñà xi mìtsà x̄ita judío [t̄ikoaá mìkiì mokjeiín-la] nga koií ótsji xi 'ñó kjoa chjine.

23 Tanga ngajen k'oaá s'ín nokjoàya-jen nga krò k'en-t'aà Cristo [x̄ita xi xó kisikasén-ne Nainá]. Jñà x̄ita judío mìkiì mokjeiín-la kjoa xi komàt'in Cristo, kò jñà xi mì x̄ita judío, kjoa ská ma-la.

24 Tanga jñà x̄ita xi xó jaàjìn-ne Nainá, xi x̄ita judío kò xi mìtsà x̄ita judío, k'oaá s'ín mokjeiín-la nga jè Cristo nga'ñó-la Nainá-né kò kjoa chjine-la Nainá-né.

25 Kjoa-la Nainá xi ta kjoa ská tsò-la x̄ita isò'nde, kjoa chjine-la Nainá-né. Ìsaá tse kjoachjine tjín-la mì k'oaá-ne koni kjoachjine xi tjín-la x̄ita isò'nde. Kò jè kjoa-la Nainá xi ta kjoa indaà tsò-la x̄ita isò'nde, nga'ñó-la Nainá-né. Ìsaá tse nga'ñó tjín-la mì k'oa-ne koni nga'ñó xi tjín-la x̄ita isò'nde.

26 Jñò ndí 'ndsè kò ndí tichjaá, t̄ikítsjeèn k'e nga sa jaàjìn-nò Nainá, chibaá ma-nò xi x̄ita chjine tsò-nò x̄ita isò'nde, kò chibaá ma-nò xi x̄ita ítjòn titsajnaà, t̄ikoa chibaá ma-nò xi ya ni'ya-la x̄ita sko-la kits'iòn.

27 Tanga Nainá jaàjìn jñà x̄ita xi tsò-la x̄ita isò'nde nga chiba kjohítsjeèn tjín-la mé-ne kosobà-la jñà x̄ita chjine. T̄ikoa jaàjìn Nainá xi tsò-la x̄ita isò'nde nga nímé chjí-la mé-ne kosobà-la jñà x̄ita xi x̄ita ítjòn titsajna.

28 Nainá jaàjìn x̄ita ima kò x̄ita xi bitjongui xi tsò-la x̄ita isò'nde nga nímé chjí-la, mé-ne k̄itjongui-ne jñà x̄ita xi tsò nga jñà titsajna ítjòn,

29 mé-ne nijngoò x̄ita xi 'nga s̄ikíjna-ne yijo-la

nga nguixkon Nainá.

<sup>30</sup> Tanga t̄ijè-ne Nainá kisikítsajnakò-ná Cristo Jesús. K'oaá t̄is'ín kis'iin nga it'aà ts'e Cristo sakó-ná jè kjoachjine, nga jè Cristo, x̄ita kixi s'ín-ná, x̄ita tsjeè s'ín-ná kò síkítsajnandej̄í-ná kjoa ts'e jé-ná.

<sup>31</sup> Koni s'ín t̄ichja Xojon-la Nainá nga tsò: “Jè xi jeya síkijna yijo-la, ta saá Nainá jeya k̄atasíkijna.”

## 2

<sup>1</sup> Ndí 'ndse kò tichjaá, k'e nga kiikon-nò nga tsibenojmí-nò 'én-la Nainá, mìtsà koi 'én kichjà-nò xi maxkón-la x̄ita k'e nga 'nchré kò xi tsò-la nga 'én-la x̄ita chjine.

<sup>2</sup> K'e nga tsohótijnako-nò, k'oaá s'ín kiskoòsòn-la; mìtsà mé kjoa xi kj'eíi kisikítsjeèn; nguì tà 'én-la Jesucristo tsibenojmí-nò, nga jè-né xi krò k'en-t'aà.

<sup>3</sup> K'e nga ijchò kènojmí-nò 'én-la Nainá, in-daàkjoá ijchoa. Titsakjoòn-ná skanda t̄ihotsé-ná.

<sup>4</sup> K'e nga kichjàyajiin-nò mìtsà 'én-la x̄ita chjine kisikjeén mé-ne nga kòkjeiín-nò. Ta saá jè Inima Tsjeè-la Nainá tsakó nga'ñó-la nga kòkjeiín-nò.

<sup>5</sup> Mé-ne jè kjoa xi mokjeiín-nò it'aà ts'e Cristo, mìtsà ya nchrobá-ne kjoa chjine-la x̄ita, yaá nchrobá-ne nga'ñó-la Nainá.

*Xi nguì kjoa chjine, it'aà ts'eé Nainá nchrobá-ne*

<sup>6</sup> Kixií kjoa 'én chjineé nokjoàya-lajen j̄nà x̄ita xi jye tímajchinga nga mokjeiín-la it'aà ts'e Cristo. Tanga mìtsà kjoa chjine ts'e isò'nde nokjoàya-jen, n̄i mìtsà ts'e x̄ita ítjòn xi t̄jín isò'nde xi jye t̄ichja nga'ñó-la.

<sup>7</sup> 'Én xi nokjoàya-jen, kjoa chjine ts'e Nainá-né, jè kjoachjine xi tjí'ma-la xi k'oas'ín kiskoòsòn-la skanda tisa kjòtseé nga jñá jeya kitsajnaá.

<sup>8</sup> Njingoò xita ítjòn xi tjín isò'nde kjòchiya-la it'aà ts'e kjoa chjine koi. Tsà kjòchiya-la, mì-là kii k'oas'ín krò kisik'en-t'aà Na'èn-ná Jesucristo xi tjín-la kjoa jeya.

<sup>9</sup> Xojon-la Nainá, k'oaá s'ín tíchja nga tsò:

Jñà xita xi matsjakeè Nainá,  
jè tjíndaà-la kjoa xi nì saá jngoò xita xi xkon beè-ne,  
xi líká-la 'nchré-ne  
xi kò inima-la machiya-la.

<sup>10</sup> Nainá, it'aà ts'e Inima Tsjeè-la tsakó-najen kjoa koi. Nga jè Inima Tsjeè-la Nainá ótsjiya yije-né skanda jñà kjoa xi mìkii ndaà fiya-ná it'aà ts'e Nainá.

<sup>11</sup> ¿Yá xita-ne xi machiya-la kó tsò kjohítsjeèn xi tíjiin inima-la xita xi kj'eíí? Tà jè tíjiin inima-la kó tsò kjohítsjeèn-la. K'oaá tís'ín tjín kjoa ts'e Nainá, njingoò xita tíjiin-la kó tsò kjohítsjeèn-la Nainá; ta jè Inima Tsjeè-la tíjiin-la.

<sup>12</sup> Ngajen, mìtsà jè inima-la xita isò'nde kitjoé-najen. Jè Inima Tsjeè-la Nainá kitjoé-najen, mé-ne nga jcha-najen kjoa xi Nainá kitsjaà kjotjò-ná.

<sup>13</sup> 'Én koi, k'oaá s'ín nokjoà-jen koni s'ín okóya-najen Inima Tsjeè-la Nainá. Mìtsà kjohítsjeèn ts'e xita isò'nde. 'Én Tsjeè-la Nainá bènojímí-jen xi kjoa ts'e Inima Tsjeè-la.

<sup>14</sup> Jè xi mìtsà xita-la Cristo, mìkii machiya-la 'én xi ts'e Inima Tsjeè-la Nainá. Tà kjoa ská ma-la.

Mikiì fahas'en-jiìn-la, nga mochjeén-né nga it'aà ts'e Inima Tsjeè-la Nainá kinchátsjiyaá.

<sup>15</sup> Tanga jè xita xi Inima Tsjeè-la Nainá tijnajiìn inima-la, maá-la ótsjiya yije nita mé kjoa-ne. Tanga it'aà ts'e xita jè, mì yá xita xi koma-la kohótsjiya kjohítsjeèn-la.

<sup>16</sup> K'oaá s'in tichja Xojon-la Nainá nga tsò: “¿Yá-né xi beè kjohítsjeèn-la Nainá? ¿Yá-né xi koma kokòya-la?” Tanga jñá tjin-ná kjohítsjeèn xi ts'e Cristo.

### 3

#### *Jñà xita xi síxá it'aà ts'e Nainá ján Corinto*

<sup>1</sup> Jñò ndí 'ndsè kò tichjaá, mikiì komà kos'in kichjàkò-nò koni xita xi ndaà tíjìn inima-la Inima Tsjeè-la Nainá. Ta k'oaá s'in kichjàkò-nò koni tsà taxki xita isò'nde xi tà kjoa ts'e yijo-la ótsji, koni tsà tákó ndí ixti xó xi it'aà ts'e Cristo.

<sup>2</sup> Mitsà 'in tjin 'én xi tsakoòya-nò; k'oas'in ngaya-la koni ndí ixti xó xi sa nchihoki, tà tsjin 'biì, mitsà tsojmì tájaà kine. Jñò, kj'eè kiì ndaà fahas'en-jiìn-nò 'én-la Nainá, k'oaá ngaya-la koni tsojmì tájaà xi kj'eè kiì ma chine skanda nachrjein j'ndeì.

<sup>3</sup> Táko k'oaá s'in 'nè koni s'in xita xi kjoa ts'e yijo-la ótsji. Machinicha-nò xinguiòo, chitiya-nò nita mé kjoa-ne. Kjoa koi, kjoa ts'e xita isò'nde-né.

<sup>4</sup> K'e nga bixón: “An, xita ts'e Pablo-ná”, kò jè xi ijngoò tsò: “An, xita ts'e Apolos-ná”, jñò, k'oaá s'in nokjoà koni chja xi taxki xita isò'nde.

<sup>5</sup> An xi Pablo 'mì-na, kò Apolos, tà xita chi'nda-nájen xi nixá-lajen Nainá. It'aà tsajeén

kòkjeiín-nò 'én-la Nainá, nga ìjngoò ìjngoò-jen ki'nè-jen xá xi Na'è-ná kisìngatsja-najen.

<sup>6</sup> Aán tsakoòya-nò 'én-la Nainá, k'oaá ngaya-la koni jngoò xita xi bítje xojmá, jè Apolos kiskiníndá-la, tanga jè Nainá tísíjchá.

<sup>7</sup> Mìtsà jè xita xi bítje tsojmì, ñi mìtsà jè xi kiníndá-la xi chjí-la, ta jngoò jè Nainá xi síjchá tsojmì xi sitje xi 'ñó chjí-la.

<sup>8</sup> Jè xi bítje ko xi kiníndá-la, ta jngoò xá tjin-ne xi s'ín. Tanga jè Nainá tsjá-la chjí-la koni tjin xá xi kis'ìn nga jngoò ìjngoò.

<sup>9</sup> Ngajen, yaá taña nìxákjoò-jen xá-la Nainá. Koa jñò-nò ì'nde ñánda sitje 'én-la Nainá. Tìkoaá jñò-nò ni'ya-la Nainá xi ngajen bíndaà-jen.

<sup>10</sup> Koni s'ín tjin kjondaà-la Nainá xi kitjoé-na, 'an-ná xi chjine chrjó ítjòn, xi tsibijnà tàts'en chrjó-la ni'ya. Kj'eíí xitaá bíndaàsòn ni'ya. Tanga jñà xi bíndaàsòn, ndaà kàtasíkinda nga jngoò ìjngoò kós'ín kìindaà.

<sup>11</sup> Mì tì yá xi koma-la kìijna ìjngoò-ìsa tàts'en chrjó ni'ya koni jè xi jye tíjna, nga jè Jesucristo tíjna koni tàts'en chrjó ni'ya.

<sup>12</sup> Tàts'en chrjó ni'ya, komaá sindaàsòn-ne kicha oro, plata, ndajo chjí xi 'ñó ndaà kjoàn, nas'ín yá, nas'ín xka paja, o xka ndiji.

<sup>13</sup> Tanga jñà xá xi s'ín nga jngoò ìjngoò xita, k'eé jcha-la jè nachrjein k'e nga sindaàjiin-la xita. Nachrjein jè, ni'ín kjoíiko, koa jè ni'ín skót'aà nga jngoò ìjngoò skaya xá xi komà.

<sup>14</sup> Tsà jngoò xá kichìkjoako-la ni'ín xi skót'aà, tjoé-la chjí-la jè xita xi kìindaàsòn.

<sup>15</sup> Tanga tsà jè xá xi kisindaàsòn, tsà kiti, chijaá



chjí-là. Tanga jè xítà kítjokàjín kjo'in koni jngoò xítà xi bitjokàjìn ni'ín.

<sup>16</sup> Jñò, ¿a mìtsà tíjìn-nò nga ni'ya ingo tsjeè-là Nainá 'mì-nò? Nga jè Iníma Tsjeè-là Nainá tíjnajìn-nò.

<sup>17</sup> Tsà yá xítà xi mejèn-là sùkíts'ón-jìn-là ni'ya tsjeè-là Nainá, Nainá tíkoáá sùkíts'ón-jìn-là jè xítà xi k'oas'ín s'jìn. Nga jè ni'ya-là Nainá, tsjeè-né. Koá jñò-nò xi ni'ya tsjeè-là Nainá 'mì-nò.

<sup>18</sup> Kì yijo-nò chonachan-là, tsà yá xi k'oas'ín síkítsjeèn nga 'ñó tíjìn-là kjohítsjeèn xi ts'e kjoá chjine-là isò'nde, ta saá kos'ín kàtas'ín koni tsà tsjìn-là kjohítsjeèn, mé-ne nga nguì xítà chjine koma-ne.

<sup>19</sup> Jè kjoá chjine-là xítà isò'nde, it'aà ts'e Nainá, kjoá ská tsò-là. Xojon-là Nainá, k'oáá s'ín tíchja nga tsò: “Nainá, k'oáá s'ín s'ín nga jñà xítà chjine, tíjñà-ne kjoá maña-là kixojìn-ne.”

<sup>20</sup> Jè Xojon-là Nainá, òjngoò k'a tíjít'aà ñánda tsò: “Nainá, beè-né nga nímé chjí-là kjohítsjeèn-là xítà xi chjine tsò-là yijo-là.”

<sup>21</sup> K'oáá ma-ne, jñò, kì nijngoò xítà xi 'nga nìkíjna. Nga ngats'ì xi tíjìn, kjondaà tsajòn yije-nò.

<sup>22</sup> Tsà jè Pablo, tsà jè Apolos, tsà jè Cefas [xi tíkoá Pedro 'mì], tsà jè isò'nde, tsà jè kjoabinachon, tsà jè kjoá biyaà, tsà jè nachrjein ò'nde, tsà jè nachrjein xi sa nchrobá, kjondaà tsajòn yije-nò.

<sup>23</sup> Jñò, ts'e Cristo-nò, koá jè Cristo ts'eé Nainá.

## 4

*Xá-là xítà xi tsibíxáya-là Jesús*

1 K'oaá s'ín jchatakòn-nájen koni xita chi'nda xi síxá-la Cristo, nga ngajen kjòngatsja-jen nga kokóya-jen kjoa tji'ma-la Nainá.

2 Jngoò xita xi xá mangatsja, mochjeén-né nga kàta'ya-la nga kixi síkitasòn xá-la.

3 'An, mìkìl sìkájnoa xi it'aà tsajòn kó tsò kjohítsjeèn-nò, a ndaá tìsìkitasoàn, a xi ch'oó tìsìkitasoàn xá xi 'an kjòngatsja, kò kó s'ín síkítsjeèn jña xitaxá xi bíndaàjìl-la xita isò'nde. Skanda 'an, mì tì kii xan-na tsà ndaà tjin kò tsà ch'oó tjin xá xi tìs'iaàn.

4 'An, nas'ín k'oas'ín sìkítsjeèn nga tsjìn-na jé, tanga mìtsà tsò-ne kjoa nga nguì xita kixi-ná. Nga jè Nà'èn-ná xi bíndaàjìl-na.

5 K'oaá ma-ne kì tá chjà jé bìnè-là xinguiòo nga ti kje'è bijchó nachrjein. Chíña-kjoaa k'e nga kjoí Nà'èn-ná xi síhiseèn nga jcha-la kjoa xi tji'ma ñánda nga jñò choòn. Koa sìkatsejèn kó tsò kjohítsjeèn xi tji'jìl inima-la xita. Ikjoàn Nainá jeya sìkíjna koni s'ín nga ok'in-la nga jngoò jngoò xita.

6 Ndí 'ndsè kò tichjaá, koi 'én tìchjàkò-nò kjoa xi mangásòn it'aà ts'an kò it'aà ts'e Apolos xi kjondaà tsajòn mé-ne nga mìkìl sìkatonè-là koni tsò 'én-la Nainá. Kì k'oaá s'ín nìkítsjeèn nga jngoò chi'nda-la Nainá isa ndaà nachrjenguioò koni chi'nda xi i'nga.

7 Jñò, ¿mé-ne koa bixón-nò nga isa 'ñó chí-nò koni xita xi i'nga? ¿Mé kjondaà xi tjin-nò xi mìtsà Nainá kitsjaà-nò? Tsà jye kitjoé-nò ngats'ii kjondaà, ¿mé-ne nga 'nga ma-ne takòn koni tsà ta nga'ño tsajòn kisakò-nò?

8 Jñò, k'oaá s'ín machiya-nò koni tsà jyeé ma yije-nò, koni tsà 'ño xita nchiná it'aà ts'e Nainá.

K'oaá s'ín nìkítsjeèn koni tsà xitaxá ítjòn titsajnaà ko ngajen mìtsà xitaxá titsajna-jen. Ndaà-la tjin tsà kixi kjoa nga otixoma, mé-ne ngajen koma kotixomako-nòjen.

<sup>9</sup> 'An, k'oaá s'ín s'ikítsjeèn, ngajen xi it'aà ts'e Cristo kisixáya-najen, Nainá k'oaá s'ín kiskoòsòn-la nga ngajen-nájen xi fehet'aà-ne, xi tjinè-najen nga kiyá-jen nga nguixkon isò'nde, nga nguixkon xita ko àkjale. Jñà xita, tà nchikotsejèn-najen nga tsja ma-la mé kjo'in xi tímat'in-jen.

<sup>10</sup> Ngajen, xi kjoa ts'e Cristo, xita ská 'yatakòn-najen; tanga jñò, it'aà ts'e Cristo, k'oaá s'ín 'ya-nò nga 'ñó tjin-nò kjoachjine. Ngajen, k'oaá s'ín 'yatakòn-najen nga xita indaàkjoa-nájen; tanga jñò, xita tájaà-nò. Ngajen, mì yá xita beèxkón-najen; jñò, beèxkón-nò xita.

<sup>11</sup> Skanda jè hora jè, kjinchrá-najen, xindá-najen, tsjin-najen nikje xi chikjá-jen, 'ñó beètòòn-najen xita, tà tjaàsòn-najen, tsjin-najen ni'ya.

<sup>12</sup> Skanda bijtaá-najen nga 'ñó nixá-jen. K'e nga chja'on-ko-nájen xita, ngajen, nijét'aà-lajen Nainá nga kàtasíchikon-t'in. K'e nga kondra fi-najen xita, chikjoakoó-najen.

<sup>13</sup> 'On chjako-najen xita, ngajen ndaà nokjoá-lajen. K'oas'ín beè takòn-najen koni tsà tjé-la isò'nde. Skanda nachrjein i'nde, jñà xita k'oaá s'ín beètakòn-najen koni tsojmì xi ningui-ne nga bíxteèn.

<sup>14</sup> Koni s'ín tikjil-nò, mìtsà tìs'iìn sobà-nò. Kjohítsjeèn titsja jngoò-nò koni tsà ixti ts'an xi matsjake.

15 Nas'ín te jmiì ma-ne xi okóya-nò it'aà ts'e Cristo, ta jngoò ma-ne xi na'èn-nò. 'An-ná xi komà na'èn-nò nga mokjeiín-nò it'aà ts'e Cristo Jesús nga 'aán tsibenojmí ítjòn-nò 'én ndaà-la Nainá xi kjoa ts'e Cristo.

16 K'oaá ma-ne bìtsi'bà-nò nga k'oas'ín tijchá yijo-nò koni 'an.

17 Koií kjoa-la tìsikasén-nò Timoteo, xi ki'ndí-na xan-la nga 'ñó matsjake kò kixi síxá-la Na'èn-ná. Jè sìikítsjeèn-nò kós'ín tìjñakoá Cristo Jesús nga mokjeiín-na it'aà ts'e, koá kós'ín okoòya-la xitá naxandá-la Cristo nga kijndà naxandá ñánda bijchoa.

18 Tjín i'nga xitá xinguiqo xi 'ñó 'nga chja, k'oaá-là s'ín síkítsjeèn tsà mìkiì kjíkon-nò.

19 Tanga tsà Nainá mejèn-la, kjíkon nitoón-nò. K'e nga kijchoa, skoeè jñà xitá xi 'nga chja, a nga'ñó-la Nainá xi tjín-la a xi tà jè 'én-la xi 'nga chja.

20 K'e nga jè Nainá tíhotíxoma jngoò-la xitá, mìtsà ta kjoa ts'e 'én mochjeén, koó nga'ñó-la Nainá mochjeén.

21 Jñò, ¿kós'ín mejèn-nò nga kjián? ¿A mejèn-nò nga kjo'in tsjaà-nò k'e nga kijchokon-nò, a xi mejèn-nò nga kò kjondaà-na kò kjotsja-na kijchokon-nò?

## 5

*Jé xi kisakò ya ijùin naxandá-la Cristo ján Corinto*

1 Jye na'yà-la nga kjoachijngui tíma ijùin tsajòn. Kjoa xi tíma, skanda jñà xitá xi mìkiì beèxkón

Nainá, mì k'oaá s'ín. Nga yaá tíjnajiìn jngoò-nò xita xinguiḡo xi neajòn-la tsóhoko.

<sup>2</sup> Jñò, ¿mé-ne 'nga níkítsajna-nò yijo-nò? Mochjeén-né nga kjoaba kitsajnajñòò, kò jè xita xi kotjín jé tíhótsji, tìnachrjekàjioòn.

<sup>3</sup> 'An, kixí kjoa, kjiìn tíjna-nò, tanga kjohítsjeèn-la inima-na yaá tíjnajiìn osen-nò. 'An, k'oaá ngaya-la koni tsà ya tíjnajiìn-nò, jyeé kiskoòsòn-la mé kjo'in xi sinè-la jè xita xi k'oa tíjín jé tíhótsji.

<sup>4</sup> Jñò, k'e nga koxkóya nga jeya síkíjna Jesucristo xi otíxoma-ná, jè kjohítsjeèn-la inima-na yaá kíjnajiìn-nò, tikoá yaá kíjnajiìn-nò jè nga'ñó-la Na'èn-ná Jesucristo. Kò it'aà ts'e Na'èn-ná Jesucristo,

<sup>5</sup> xita jè, xita neí kàtangatsja yijo-la nga kàtas'e-la kjo'in, kò kàtasíkájno jé-la nga mì tì jé kohótsji-ne mé-ne nga kitjokàjiìn-ne kjo'in inima-la, k'e nga kjoíi ñngoò k'a Jesucristo xi otíxoma-ná.

<sup>6</sup> Mìkìi ndaà tíjín nga 'nga níkítsajna yijo-nò. ¿A mì tíjìn-nò nga nas'ín ta chiba na'yo san sísan yije xíkjín na'yo?

<sup>7</sup> Tìnachrjekàjioòn jè xita xi ótsji jé k'oaá ngaya-la koni tsà na'yo san xi mì tì ndaà-ne nga síkíts'ón-nò, mé-ne jñò k'oas'ín kjoàn koma-nò koni na'yo xitse ts'e inchrajín xi tsjin-la na'yo san. Nga jñò, jyeé kitjaàxìn-nò kjoa ts'e jé koni na'yo san jchínga nga jè Cristo k'en ngajo-ná koni jñà orre xi kisik'en xita Israel k'e nga Paxko.

<sup>8</sup> Koií kjoa-la jñá, k'oaá s'ín kìnáchrjeé s'eí nga jyeé kisíkítsajnandeíi-ná Nainá kjoa ts'e jé, koni s'ín xita Israel k'e nga Paxko nga sítsjeè ni'ya-la nga faáxìn yije na'yo san. Jñá, k'oaá tís'ín chjaàxián

kjoa ts'e jé kjoa ch'o kjoa ngui kjoatsjeè kjo kjoakixi sikjeén k'oaá ngaya-la koni inchrajín xi tsjìn-la na'yo san.

<sup>9</sup> Jè xojon xi kisikasén ítjòn-nò, k'oaá kixan-nò nga mì ya koahijtakoo jñà xita xi kjoa chingui s'ín.

<sup>10</sup> K'e nga k'oa kixan-nò, mìtsà jñà kisikaxkia jñà xita isò'nde xi kjoa chingui s'ín, kjo jñà xi tse mejèn-la, kjo jñà xita chijé, kjo jñà xi xkósòn beèxkón. Xita koi, xki xi ján satíkjoè. Ta jè xi koma kinchat'aaxìn-là tsà xìn isò'nde onguió.

<sup>11</sup> Jñà 'én xi kixan-nò, jè-né nga mì ya tsjahij-takoo jñà xi tsò nga xita-la Cristo xi 'ndsè chibá tsà tákó kjoa chingui nchis'ín, xita xi tse mejèn-la, xi xkósòn beèxkón, xi ch'o chjajno-ná, xi xán 'biì, xi chijé s'ín. Jñà xita xi k'oas'ín s'ín, skanda mìkiì mochjeén nga kichikoo.

<sup>12-13</sup> Mìtsà jñá oko-ná nga bíndaàjìin-lá jñà xita isò'nde. Jè Nainá kìindaàjìin-la jñà xita koi. Tanga jñò oko-nò nga kíndaàjìin-là xita naxandá-la Nainá xi tsajòn. K'oaá ma-ne nga xan-nò, chjaaxiòn jè xita xi ch'o tís'ín xi ya tíjnajìin-nò.

## 6

*Kós'ín s'íin jñà xita-la Cristo nga tíjñà xikjín koìindaàjìin-la*

<sup>1</sup> Jñò, k'e nga tsà kjoasiì tjín-nò kjo xita xinguióo, ¿mé-ne jñà mejèn-nò koìindaàjìin-nò jñà xitaxá xi mìtsà xita-la Cristo? ¿A mìtsà tà jñà kàtindaàjìin-nò xi xita naxandá-la Cristo?

<sup>2</sup> ¿A mìtsà tíjìin-nò nga jñá xi xita naxandá-la Cristo 'mì-ná, jñá kíndaàjìin-lá xita isò'nde? Tsà jñò

kojindaàjìin-là xit̩a isò'nde, ¿a mì chíkjoa-nò nga ta jñò kındaàjìin-là xit̩a xingui̩o kjoa xi chiba t̩jín?

<sup>3</sup> ¿A mìtsà tíjìin-nò nga t̩kjoa it'aà tsaján kındaàjìin-lá àkjale? Tsà jñá kındaàjìin-lá àkjale, ¿a mì koma-ná kındaàjìin-lá xit̩a xingui̩aá kjoa xi t̩jín i isò'nde?

<sup>4</sup> K'oaá ma-ne tsà ta kjoa ts'e isò'nde-né xi t̩jín-nò, t̩nókjoa jngoò-là xit̩a 'ndsé xi jñò nachrjengui̩oò nga 'mì-là n̩imé chjì-la, jè kàtindaàjìin-nò.

<sup>5</sup> Koií koa xan-nò mé-ne nga kàtasobà-nò. ¿A mìtsà tíjna jngoò xit̩a xingui̩o xi t̩jín-la kjohítsjeèn nga koma-la kojindaàjìin-la xit̩a xi 'ndsé chibá?

<sup>6</sup> Mìtsà ta koií kjoa-la nga bixkàn-koò xingui̩o, skanda yaá onguíkoo xingui̩o nguixkon xit̩axá xi mìkìi beèxkon Nainá nga bındaàjìin-nò.

<sup>7</sup> Kixí kjoa, ch'oó t̩jín kjoa k'e nga t̩jñò bixkàn-ko-nò xingui̩o. ¿Mé-ne mìtsà ta saá n̩ikjeiín-là xingui̩o k'e nga ch'o síko-nò? Ta saá t̩kjeiín-la nga kàtasíchijé-nò.

<sup>8</sup> Tanga jñò, k'oaá t̩is'ín ch'o n̩ikoo xingui̩o, t̩jñò n̩ichijé-là.

<sup>9</sup> ¿A mìtsà tíjìin-nò nga jñà xi mìtsà xit̩a kixi, mìkìi kjoahas'en-jìin i'nde ñánda tíhotíxoma Nainá? Jñà xit̩a xi kjoa chijngui s'ín, jñà xi xkósòn beèxkón, jñà xit̩a xi jye chixàn xi kjoa chijngui s'ín, jñà xit̩a xi'ndè xi t̩i x'ín xíkjín oyijòko-ne,

<sup>10</sup> jñà xit̩a chijé, jñà xit̩a tse mejèn, jñà xit̩a xi xán 'biì, jñà xi xit̩a chjajno-la, jñà xit̩a xi konachan-la xíkjín nga síchijé-la, k̩i yijo-nò chonachan-là nga jñà xit̩a xi koat̩jín kjoach'o xi s'ín mìkìi kjoahas'en-jìin ñánda tíhotíxoma Nainá.

<sup>11</sup> Jñò, k'e nga sa kjòtseé k'oa t̩is'ín ki'nè i'nga;

tanga i'ndeḡ, jye kisaníno kjoa ts'e jé-nò, jye xita tsjeè-la Nainá komà, kò jye xita kixi komà it'aà ts'e nga'ño-la Jesucristo xi otíxoma-ná kò it'aà ts'e Inima Tsjeè-la Nainá.

*Kó s'ín sichjeén yijo-ná mé-ne nga jeya kína Nainá*

<sup>12</sup> Tjín i'nga xita xinguiḡo xi tsò: “An tjí'ndeé-na nita mé kjoa xi s'iaàn.” Kixí kjoa tjí'nde-né, tanga mìkì ok'ìn-la tsà k'oas'en yijeé ngats'ì kjoa; k'oaá ma-ne, 'an, mìkì tsjaà'nde-la yijo-na nga sìikijne-na jngoò kjoa.

<sup>13</sup> Tjikoáá tjín i'nga xi tsò: “Jña tsojmì xi ma chine, ts'eé indso'ba, koa jè indso'ba mochjeén-la tsojmì xi ma chine.” Kixí kjoa, tanga ingajò kjoa koi, Nainá sìkجهet'aà. Tanga jè yijo-ná, mìtsà kos'ín kochjeén nga kjoa chijngui s'eén; it'aà ts'e Nainá kochjeén; yijo-ná, ts'eé Nainá.

<sup>14</sup> Koni s'ín kis'iin Nainá nga kisikjaáya-la Na'èn-ná Jesús, jña k'oaá tis'ín kjoaáya-ná it'aà ts'e kjoa biyaà nga tjín-la nga'ño Nainá.

<sup>15</sup> ¿A mìtsà tíjìn-nò nga jè yijo-ná, yaá tíkjoòko ts'e Cristo? ¿A komaá sìkجهén yijo-la Cristo nga sìjngoòt'aà-lá ts'e chjoón ská? Majín, mìkì koma.

<sup>16</sup> ¿A mìtsà 'yaà, k'e nga jngoò xita x'in, tsà chjoón ská kijnako, jngoò yijoó koma? Nga k'oaá s'ín tíchja Xojon-la Nainá nga tsò: Ingajò xita koi, jngoò yijoó koma.

<sup>17</sup> Tanga jè xi Na'èn-ná tíjnako, yaá majngoòko inima-la kò ts'e Na'èn-ná.

<sup>18</sup> Tjinchat'aàxin-la kjoa chijngui. Jngoò xita, nita mé jé xi ótsji xi kj'eí jé, mìtsà yijo-la tíbeètoòn. Tanga jè xita xi kjoa chijngui s'ín, yijo-laá beètoòn.



19 ¿A mìtsà tǵiìn-nò nga jè yijo-nò ni'ya-la Inima Tsjeè-la Nainá-né xi jǵnò kitsjaà-nò Nainá nga tǵijnajìn inima-nò? Yijo-nò, mìtsà tǵi tsajòn-nò.

20 Nainá jye tsakatse-nò, tsee tsibíhjíjì-nò. Koií kjoa-la jchaxkón Nainá, ndaà tǵkjeén yijo-nò nga ts'eé Nainá.

## 7

### *Kjoa ts'e xita xi bixan*

1 It'aà ts'e 'én xi kichjǵnangui-ná nga kinìkasén-ná xojoñ nga bixón: “Ndaà-la tǵín, jngoò xita x'in ko jè chjoón tsà mìkì kǵxan.”

2 Tanga koií kjoa-la nga 'ñó tǵín kjoa chijngui, nga jngoò òjngoò xita x'in kàtas'e-la chjoón, ko nga jngoò òjngoò chjoón kàtas'e-la x'in.

3 Koni s'in tǵín kjotíxoma ts'e kjoa bixan, jè x'in, ndaà kàtasis'in-la chjoón-la k'e nga kójnako, tǵkjoa jè chjoón, ndaà kàtasis'in-la x'in-la.

4 Jè chjoón, mìtsà tǵjè otíxoma-la yijo-la, jè x'in-la otíxoma-la. Tǵkjoa jè x'in mìtsà tǵjè otíxoma-la yijo-la, jè chjoón-la otíxoma-la.

5 K'e nga tsjáyijòkoo xinguioo, kì yijo-nò nìxkon-là xinguioo. Tà k'e-né tsà ngásòn chibàya-nò kótǵín nachrjein mìkì tsjáyijòkoo xinguioo tsà Nainá kǵnókjoat'aà-là. Xi koma iskan mochjeén-né nga sis'in-là xinguioo nga mì jè xita neí skónachan-nò k'e nga tsà mì tǵi kǵi chíkjoa-nò nga xìn tsjáyijò-là xinguioo.

6 'Én xi tǵixan-nò tà 'an-ná xi tǵtsjaà'nde-nò; mìtsà kjotíxoma tibìnè-nò.

7 Xi it'aà ts'an, mejèn-na tsà ngats'iì xita k'oas'in kàtǵsajna tajngoò, koni 'an, tajngoó tǵjnaa. Tanga

ìjngoò ìjngoò x̄it̄a kits'ì-l̄a kjotjò xi Nainá kitsjaà-l̄a, kós'ín kitsajna. K̄akj'eí k̄akj'eí s'ín títsajna nga ìjngoò ìjngoò x̄it̄a.

<sup>8</sup> Jñà x̄it̄a xi títsajna tajngoò ko jñà íchjín xi jye k'en x'in-l̄a, ndaà-la tjín tsà tà k'oas'ín kitsajna tajngoò koni 'an.

<sup>9</sup> Tanga tsà mìkiì chíkjoa-l̄a nga bìtsajna íjngó, ìsaá ndaà-ne tsà kàtixan, mì k'oā-ne tsà tsjè s̄ìk'en.

<sup>10</sup> 'An, k'oāá s'ín bìnè-l̄a jñà x̄it̄a xi jye chixàn, nga mìkiì koma tsjeín xíkjín. Jè chjoón, mìkiì koma s̄ìk̄jina x'in-l̄a. Mìtsà kjotíxoma ts'an xi tsjaà-nò; ts'eé Nainá.

<sup>11</sup> Jè chjoón xi tsjeiin x'in-l̄a, mìkiì tjí'nde-l̄a nga kj'eí x'in kixan-ko ìjngoò k'a. Tíkooá-ne kàtajoóndaà-ne. Tíkooà jè x'in, mìkiì tjí'nde-l̄a nga tsjeín chjoón-l̄a.

<sup>12</sup> Jñà x̄it̄a xi i'nga, k'oāá xan-l̄a, xi tà kjohítsjeèn ts'an, mìtsà jè Na'èn-ná tsibíjna kjotíxoma jè. Tsà jngoò x̄it̄a x'in xi mokjeiín-l̄a 'én-l̄a Nainá, tsà jè chjoón-l̄a xi tíjnako, tsà mìkiì mokjeiín-l̄a, tsà tsò ikon jè chjoón nga bìjnako, kàtìjnako, kì tsjeiin takòn jè chjoón-l̄a.

<sup>13</sup> Tsà jngoò chjoón xi mokjeiín-l̄a 'én-l̄a Nainá, jè x'in xi tíjnako, tsà mìkiì mokjeiín-l̄a, tsà tsò ikon jè x'in nga bìjnako, kàtìjnako, kì tsjeiin takòn jè x'in-l̄a.

<sup>14</sup> Jè x'in xi mìkiì mokjeiín-l̄a 'én-l̄a Nainá, it'aà ts'e chjoón-l̄aá matsjeè-né; tíkooá jè chjoón xi mìkiì mokjeiín-l̄a, it'aà ts'e x'in-l̄aá matsjeè-né. Tsà majìn, jñà ìxti-l̄a mìtsà x̄it̄a kixi nga nguixkon Nainá, tanga i'ndeì x̄it̄a-l̄a, yaá chja-ne naxandá-l̄a Cristo.

<sup>15</sup> Tanga tsà jè chjoón xi mìkiì mokjeiín-l̄a 'én-l̄a Nainá tsà mejèn-l̄a tsjeín x'in-l̄a xi mokjeiín-l̄a,

kàtatsjeiin. Kò tsà jè xità x'in xi mìkii mokjeiin-la 'én-la Nainá, tsà mejèn-la nga tsjein chjoón-la xi mokjeiin-la, kàtatsjeiin. Jñà xità koi mìkii tjinè-la nga kjo'ñó kítsajnakò xíkjin. Nainá, jè xi mejèn-la nga 'nchán kítsajna.

<sup>16</sup> Ji chjoón xi mokjeiin-lè it'aà ts'e Cristo, mìkii tjiin-lè tsà koi nàchrjein it'aà tsiji koma kitjokàjiin kjo'in x'in-lè. Kò ji xi x'in 'mì-lè nga mokjeiin-lè it'aà ts'e Cristo, mìkii tjiin-lè tsà koi nàchrjein it'aà tsiji koma kitjokàjiin kjo'in chjoón-lè.

<sup>17</sup> Jngoò kjoà mejèn-na nga ndaà síkijna-la ngats'iì xità naxandá-la Cristo, nga ìjngoò ìjngoò xità x'in kò chjoón, mochjeén-né nga kos'in kàtasíjchá yijo-la koni s'in kitsjaà-la Nainá koni s'in títsajna k'e nga Nainá kiichja-la nga xità-la komà.

<sup>18</sup> Tsà tjin i'nga xità xi jye tjit'aà chiba yijo-la kjoà ts'e circuncisión k'e nga xità-la Cristo komà, tà k'oaá s'in kàtijna. Tsà tjin i'nga xi kj'eè kii tjit'aà chiba yijo-la, kii bit'aà chiba-la yijo-la.

<sup>19</sup> Xi kjoà ts'e circuncisión, tsà tjit'aà chiba-nò kò tsà majin, mìtsà mé-ne. Jè xi chji-la nga ndaà sikitasòn jè kjotixoma-la Nainá.

<sup>20</sup> Nga jngoò ìjngoò, k'oaá s'in títsajna koni s'in títsajnaà k'e nga kiichja-nò Nainá.

<sup>21</sup> K'e nga kiichja-lè Nainá, tsà chi'nda tijni, kii makájno-lè. Tanga i'ndeji tsà koma kijnandeji-ne, ndaà s'e, tijnandeji-ne.

<sup>22</sup> Jè xi chi'nda tís'in k'e nga kiichja-la Nainá nga kòkjeiin-la 'én-la, i'ndeji tijnandeji-né it'aà ts'e Cristo. K'oaá tis'in tjin, jè xi tijnandeji k'e nga kiichja-la Nainá, i'ndeji chi'nda-la Cristo-né.

23 Jñò, Nainá jye tsatse-nò, kì kiì biì'nde nga x̄ita xi kj'eí ch̄i'nda 'nè-là.

24 Jñò ndí 'ndsè kò tichjaá, koni s'ín títsajnaà nga jngoò ìjngoò k'e nga kiichja-nò Nainá, k'oaá s'ín títsajna ya nguixkõn Nainá.

25 It'aà ts'e x̄ita xi títsajna tajngoò, tsjìn jngoò-na kjotíxoma xi ts'e Na'èn-ná. 'An, k'oaá s'ín kosòn-là koni tsò kjohítsjeèn-na nga Nainá kis'e-là kjohimatakòn mé-ne nga it'aà ts'an kjoaàt'aà takòn-na jñà x̄ita.

26 Koií kjoa-là nga 'ñó 'in choòn nachrjein i'ndeí, 'an, k'oaá s'ín s̄ikítsjeèn, isaá-la ndaà tjín, tà k'oas'ín kàtítsajna x̄ita koni s'ín títsajna skanda nachrjein i'ndeí.

27 Tsà tjín-lè chjoón, kì nìkíjna-jèn chjoón-lè. Tsà tsjìn-lè, kì chjoón binchaàtsji.

28 Tsà kixein, mìtsà jé tìbinchaàtsji. Kò tsà jngoò chjoón xongó xi kixan, tikoáà mìtsà jé tíhótsji. Ta jè-né, k'e nga jye kixan, kjoaá s'e-nò. 'An, mejèn-na nga mì kjoa kàtas'e-nò.

29 Ndí 'ndsè, mejèn-na nga kàtasijjìn-nò, nga chiba jchán nachrjein chija nga ma sixá-lá Nainá. Koií kjoa-là jngoò x̄ita x'in xi tjín-là chjoón, k'oaá s'ín kàtas'ín koni tsà tsjìn-là chjoón.

30 Kò jñà x̄ita xi kjoaba títsajnajiìn, k'oaá s'ín kàtítsajna koni tsà mì ba títsajna. Koá jñà xi s'eí tjín-là, k'oaá s'ín kàtítsajna koni tsà mì s'eí tjín-là. Koá jñà xi tsojmì otse, k'oaá s'ín kàtas'ín koni tsà nìmé tjín-là.

31 Kò jñà xi fitjingui-là kjoa xi tjín isò'nde, k'oaá s'ín kàtas'ín koni tsà mì ya fitjingui-là; nga jè isò'nde xi títsajnasoán ijndé, kjoehet'aà-né.

<sup>32</sup> 'An, k'oaá s'ín mejèn-na nga nímé kjoa ts'e isò'nde síkítsjeèn. Jè xítà x'in xi tǐjna tajngoò, koií síkítsjeèn kjoa ts'e Nainá, mé xi s'iin nga kotsja-la Nainá.

<sup>33</sup> Tanga jè xi jye chjoón tǐjn-la, koií síkítsjeèn kjoa xi tǐjn isò'nde mé xi s'iin nga kotsja-la chjoón-la,

<sup>34</sup> k'oaá ma-ne nga jò kjoa síkítsjeèn. Tikoáá jè chjoón ka'àn xi jye k'en x'in-la kò jè chjoón xi tǐjna tajngoò xi k'èè x'in tǐjn-la, koií síkítsjeèn kjoa ts'e Nainá mé-ne nga tsjeè síkítsajna-ne yijo-la kò inima-la. Tanga jè chjoón xi x'in tǐjn-la, koií síkítsjeèn kjoa ts'e isò'nde mé xi s'iin nga kotsja-la x'in-la.

<sup>35</sup> Kjoa xi benojmí-nò kjondaà tsajòn-nò, mìtsà xan-nò nga 'an ósjna ikon-nò, jè-né nga ngui ndaà sijchá yijo-nò nga nímé kjoa kùichjoà ikon-nò nga sixá-là Nainá.

<sup>36</sup> Tsà jngoò x'in xi kos'ín tísíkítsjeèn nga mì ndaà tísíkò chjoón nga mì xátí tǐbixan-kò nga jye tǐhóto nó-la chjoón, k'oaá s'ín kàtas'ín koni s'ín síkítsjeèn, kàtixan; jè kjoa bixan, mìtsà jé nchihótsji.

<sup>37</sup> Tanga tsà jngoò xi k'oas'ín bínè-la yijo-la kò inima-la nga majìn-la kixan, nga kjohítsjeèn ts'e-né, kò tsà chíkjoa-la yijo-la nga mìkì kixan, kò tsà jye kos'ín kiskoòsòn-la, ndaà tǐjn.

<sup>38</sup> Jǎà xítà xi bixan, ndaà s'ín, tanga jǎà xi mìkì bixan, isáá ndaà s'ín.

<sup>39</sup> Jngoò chjoón xi x'in tǐjn-la, mìtsà tǐjnandeíí. K'èé-né tsà jye k'en x'in-la nga jye tǐjnandeíí. Koma kixan-kò nítà yá x'in-ne xi matsjakeè tsà tanga mokjeíín-la 'én-la Nainá.

<sup>40</sup> 'An, k'oaá s'ín síkítsjeèn, ndaà-la tǐjn tsà mì tǐ kù kixan-ne jǎà íchjín ka'àn. Tikoáá 'an,

k'oaá s'ín machiya-na nga jè Inima Tsjeè-la Nainá tísichiya-na.

## 8

### *Tsojmi xi sinchásòn ya nguixkon xkósòn*

<sup>1</sup> Jè kjoa xi ts'e yijo-la cho xi sík'en-la xkósòn-la xita isò'nde nga tsjá-la kjotjò, jñò bixón-nò nga ngats'iaá jyeé tjín-ná kjoachjine it'aà ts'e kjoa koi. Kixíí kjoa, tanga k'e nga tjín-ná kjoachjine, ma'ngaá takoán. Tanga k'e nga tjín-ná jè kjotsjacha, isaá ndaà 'bù-lá nga'ño xinguiáá.

<sup>2</sup> Tsà tjín i'nga xita xi tsò nga ndaà machiya-la, chijaá isa-la; kje'èè kiì beè yije koni s'ín tjínè-la nga skoe.

<sup>3</sup> Jngoò xita xi matsjakeè Nainá, jè Nainá ndaà beèxkon.

<sup>4</sup> K'oaá xan-nò kó s'ín tjín, tsà ma chine yijo-la cho xi ya biyaàt'aà-la jñà xkósòn. Tíjìin-ná nga jñà xkósòn xi tjín i isò'nde, nímé nga'ño tjín-la. Nga ta jngoò ma-ne xi Nainá.

<sup>5</sup> Jñà xita, k'oaá s'ín síkítsjeèn nga kjin ma nainá xi tjín ján ngajmiì ko it'aà nangui. (Kixíí kjoa it'aà ts'e xita koi, kjin ma xi nainá ko na'èn-ná tsò-la.)

<sup>6</sup> Tanga jñá, 'ya-ná nga ta jngoò ma-ne Nainá xi Na'èn-ná nga it'aà ts'eé inchrobà-ne nita mé xi tjín. Jñá, koií xá tjín-ná nga sikitasoán xá-la. Tikoáá ta jngoò ma-ne xi otíxoma-ná, jè Jesucristo; nga it'aà ts'eé nga'ño-la kisindaà yije nita mé xi tjín ko tikoáá jñá, it'aà ts'eé titsajnakoaán.

<sup>7</sup> Tanga mìtsà ngats'iì xita tíjìin-la kjoa koi. Tjín i'nga xita 'ndseé xi jye k'oas'ín kjò'nga-la kjoa ts'e xkósòn k'e nga tikje'èè mokjeiín-la. Tanga i'ndeji, k'e nga kine yijo-la cho xi ya biyaàt'aà-la jñà xkósòn,

k'oaá s'ín síkítsjeèn nga jñà nchibeèxkón xkósòn xi nainá tsò-la xità isò'nde. Nga jò tjín kjohítsjeèn-la, k'oaá s'ín fiya-la nga jé ótsji nguixkòn Nainá.

<sup>8</sup> Jñò bixón-nó nga jñà tsojmì xi ma chine, mìtsà koi kjoa-la nga isà ndaà skoétjò-ná Nainá. Tsà kichiaá mìtsà isà ndaà kitsajnaá kò tsà mìkì kichiaá mìtsà isà ch'o kitsajnaá nga nguixkòn Nainá.

<sup>9</sup> Kixií kjoa, tjí'nde-ná nità mé xi chjineé. Tanga jñà jchósòn-lá yijo-ná nga mì k'oaá tjín xi chjineé mé-ne jñà xità 'ndseé xi indaàjiìn tjín kjohítsjeèn-la mì jé sakò-la.

<sup>10</sup> Tsà tjín jngoò xità xinguiò xi tsò nga tjín-la kjohítsjeèn nga ma chine nità mé yijo-ne, kò yaá fi kakjèn ya i'nde ñánda yaxkón xkósòn; tsà koi nàchrjein-la ya skoe jngoò 'ndsé xi indaàjiìn tjín kjohítsjeèn-la nga ya tíkjèn. Jè xità 'ndsé, k'oaá tis'ín s'jìn.

<sup>11</sup> Kjohítsjeèn-la xità jè nga tsò nga maá chine yije nità mé-ne, koií kjoa-la nga kjo'in sùkjeín jè 'ndsè xi indaàjiìn tjín kjohítsjeèn-la xi Cristo k'en ngajo-la.

<sup>12</sup> K'e nga jé binchaàtsjioè xi kondrà ts'e xità 'ndseé nga nìkìts'ón-jñoò kjohítsjeèn-la xi indaàjiìn tjín, jé binchaàtsjioè xi kondrà ts'e Cristo.

<sup>13</sup> 'An, tsà ta koií kjoa-la ts'e tsojmì xi kínee nga jé sakò-la jè 'ndsè, tìkoaá-ne, jngoò k'a mì tì kii skíne-na yijo, mé-ne nga mì jé sakó-la 'ndsè.

## 9

*Kjoa xi tjí'nde-la xità xi tsibíxáya-la Cristo*

1 'Aán tsibíxáya-na Cristo. Tijnandeíí-ná. Xkoaàn kijtseè-na jè Jesús xi otíxoma-ná. Nga xá-la Na'èn-ná tis'iaàn, i'ndeí jñò-nò xi xítà-là Cristo maà.

2 K'oaá xó tsò i'nga xítà xi kjeíí nga mì xó tsà 'an tsibíxáya-na Cristo, tanga jñò, ndaà tíjìin-nò nga 'aán kisìxáya-na, nga it'aà ts'an-ná nga mokjeíin-nò 'én-là Nainá. K'oaá s'ín bitjo kixi kjoa.

3 K'e nga jngoò xítà kjònangui-na xi kondra ts'an, 'an, kíí xan-là nga ósikoaa yijo-na:

4 ¿A mìtsà tíj'nde-najen nga k'oi-najen tsojmì xi chine-jen kò xi s'io-jen nga xá-la Nainá títsa'nè-jen?

5 ¿A mìtsà tíj'nde-najen nga kitjako jngoò-jen xi chjoón-najen ma xi 'én-là Nainá mokjeíin-là, koni s'ín xítà xi i'nga xi tsibíxáya-là Cristo koni jñà 'ndse Na'èn-ná kò Cefas [xi tikoá Pedro 'mì]?

6 ¿A tà 'an-ná kò Bernabé xi tíj'nè-najen nga kjeíí xá s'en-jen mé-ne nga sakò-najen tsojmì xi chine-jen?

7 ¿A tíjín xítà xi soldado síkitasòn xi tíjé bíchjí-la yijo-là? ¿A tíjín xítà xi bítje tsojmì tjé, koa mìkìì kine toò xi ojà-là? ¿A tíjín xítà xi cho síjchá, koa mìkìì 'bii tsjìn xi ochrje?

8 Kì k'oaá s'ín nìkítsjeèn nga tà kjohítsjeèn ts'an koni s'ín tixan. Tikoáá tíchjaá kjotíxoma ts'e Moisés.

9 Kjotíxoma-là Nainá xi kiskìì Moisés, k'oaá s'ín tíchja nga tsò: “Jñà nchraja xi bínchi, kì na'ya bì'a tso'ba.” 'Én koi mìtsà tsò-ne kjoa nga Nainá 'ñó síkinda nchraja,

10 jñá-ná xi síkinda-ná Nainá; nga it'aà tsaján tíchja kjotíxoma. Jè xi síkínchi nchraja kò xi sítsjeè



tsojmì xi majchá-la, nchikoñaá-la nga tjoé chiba-la tsojmì xi majchá-la.

<sup>11</sup> 'Én ndaà-la Nainá xi kjoa ts'e Cristo xi jin tsakoòya-nòjen jè ngaya-la koni tachó xi kisitje ijìn inima-nò. ¿A mì ndaà s'e tsà tjoé chiba-najen tsojmì xi majchá-nò?

<sup>12</sup> Tsà jñà xi k'ejí xita tjoé chiba-la tsojmì xi tsajòn, ngajen, ¿a mìtsà isa ndaà tjí'nde-najen nga tikoá tjoé-najen?

Tanga mì k'oaá s'ín titsa'nè-jen koni s'ín tjí'nde-najen mé-ne nga mikì koma sichjoà ikon-la 'én ndaà-la Nainá xi kjoa ts'e Cristo.

<sup>13</sup> Jñò, ndaà 'yaà, jñà xita xi ya síxá ya Ingo Ítjòn-la Nainá, koií tsojmì kine xi tjín ya i'nde jè; ko jñà xi ya síxá i'nde tsjeè-la Nainá ya ñánda binchásòn kjotjò xi tsjá-la Nainá jñà xita, okoó chiba-la yijo-la cho xi ya binchásòn.

<sup>14</sup> Nainá k'oaá s'ín kitsjaà okixi: jñà xi chjaya 'én ndaà-la Nainá xi kjoa ts'e Cristo yaá sakò-la tsojmì xi skine.

<sup>15</sup> 'An, mì k'oaá s'ín tìsikjeén jñà kjoa xi tjí'nde-na. Tikoáá mìtsà koi xá tikjiì-nò nga kos'ín síko-ná. Isáá-la ndaà tjín tsà kàtiyaà mì k'oaá-ne tsà tjín xita xi kjoaáxìn-na kjotsja xi tjín-na nga ta kjotjò 'an chjaya 'én ndaà-la Nainá xi kjoa ts'e Cristo.

<sup>16</sup> Nga 'én ndaà-la Nainá xi kjoa ts'e Cristo chjaya, mikì tsà jeya síkíjna yijo-na. 'An, xó k'oaá s'ín tjínè-na nga 'an kichjaya; ima xó-na tsà mikì kichjaya jè 'én ndaà-la Nainá xi kjoa ts'e Cristo.

<sup>17</sup> Tsà tà kjohítsjeèn ts'aán-là nga kos'ín tìs'iaàn, tjínè-la nga kochjí-na, tanga mìtsà tà kjohítsjeèn ts'an, jè tìsìkitasoàn xá xi kisingatsja-na Nainá.

18 Jè chjí xi tísakó-na, jè-né nga tsja tjin-na nga chjàya 'én ndaà-la Nainá xi kjoa ts'e Cristo nga mitsà chjí-na sùjé, nas'ín tji'nde-na nga jè 'én ndaà-la Nainá xi kjoa ts'e Cristo kótijnakon-na.

19 'An tijnandeíí-ná, tanga i'ndei, k'oaá s'iaàn koni tsà chi'nda-la ma ngats'ìì xita, mé-ne nga isa kìn xita koma kichjà-la 'én-la Cristo nga kòkjeíín-la.

20 K'e nga ya tijnajìin-la jñà xita xinguiáa judío, k'oaá s'ín s'iaàn koni s'ín xita judío mé-ne nga koma kichjà-la 'én-la Cristo nga kòkjeíín-la. Kixíí kjoa nga 'an, mìkìì kjo'ñó tjiné-na nga kòs'ín sikitasoàn koni tsò kjotíxoma xi kiskìì Moisés, tanga k'e nga ya tijnajìin-la jñà xita judío xi kjotíxoma-la Moisés títsajnajìin, 'an k'oaá ti s'iaàn, ta jè xi mejèn-na nga koma kichjà-la 'én ndaà-la Nainá xi kjoa ts'e Cristo nga kòkjeíín-la.

21 K'e nga ya tijnajìin-la jñà xita xi mìtsà ya títsajnajìin kjotíxoma-la Moisés, 'an, k'oaá ti s'iaàn koni tsà mì ya tijnajñàà kjotíxoma mé-ne nga koma kichjà-la 'én-la Cristo nga kòkjeíín-la xita xi mì ya títsajnajìin kjotíxoma. Mìtsà tsò-ne kjoa nga tijnat'aà xìn-la kjotíxoma-la Nainá. Yaá tijnajñàà kjotíxoma-la Cristo.

22 K'e nga ya tijnajìin-la jñà xita xi indaàjìin tjin kjohítsjeèn-la, 'an, k'oaá s'iaàn koni tsà tikoáá indaàjìin tjin kjohítsjeèn-na mé-ne nga koma kichjà-la 'én-la Cristo xita koi. Yaá s'ingásòn yijekoáa mé kjoa xi títsajnajìin ngats'ìì xita mé-ne nga koma kochrjekàjìin i'nga-na kjo'in kjoa ts'e jé-la.

23 K'oaá s'iaàn xi kjondaà ts'e 'én ndaà-la

Nainá xi kjoa ts'e Cristo mé-ne nga s'e-na kjoa machikon-t'in it'aà ts'e 'én.

<sup>24</sup> Jñò, jyeé tjiin-nò k'e nga síská xita xi on-gachikon, ngats'iì-né nga ongachikon, tanga ta jngoò-né xi tjoé-la kjotjò, ta jè xi síkijne. Jñò, k'oaá s'in tijchá yijo-nò nga xita-la Cristo 'mì-nò koni jngoò xita xi ongachikon mé-ne nga tjoé-nò kjotjò xi Nainá tsjá-nò.

<sup>25</sup> Jñà xita xi sískákjoò nga mejèn-la sijkijne, ítjòn bitsajnandaà nga mì tijnà sijkjeén-ne tsojmì xi ch'o síko; koi k'oas'in-ne nga mejèn-la tjoé jngoò-la kjotjò. K'e nga jye ma iskan, jè kjotjò xi tjoé-la, ta bits'on-né. Tanga jñá bitsajnandaá nga tjoé jngoò-ná kjotjò xi mìkì bits'on nita kjé-ne.

<sup>26</sup> 'An, mìtsà k'oas'in ongachikoan [kjoa ts'e xá-la Nainá] koni jngoò xita xi mìkì beè ñanda kijchò. Tikoáà mìtsà k'oas'in [sìxá it'aà ts'e Nainá] koni s'in xita xi ta 'beéjiin isén k'e nga kjaán-ko xikjín.

<sup>27</sup> 'An, k'oaá s'in bìnè-la yijo-na nga kátas'e-na kjo'in mé-ne k'e nga kjoehet'aà nachrjein nga okoòya-la xita 'én ndaà-la Nainá xi kjoa ts'e Cristo, Nainá mì kitso-na: “Nì mé chjí-la xá-lè.”

## 10

### *Kjoa ts'e xkòsòn xi mìtsà kixi kjoa nga Nainá*

<sup>1</sup> Jñò ndí 'ndsè ko tichjaá, kì nìchàajiin-jèn nga jñà xita jchínga kjìin-ná, [k'e nga itjoiin naxandá Egipto], yaá tsibítsajnangui yije jjiin ifi [nga tsakó-la ndiyá], tikoáà ngats'iì tsatojiin ndáchikon.

<sup>2</sup> K'oaá ngaya-la koni tsà komà bautizar ya jjiin ifi ko jjiin ndáchikon mé-ne nga xita-la Moisés koma-ne.

3 K'oaá t̄is'ín jngoò skaya tsojmì kiskine xi kjoḁkón ndaà ts'e Nainá.

4 T̄ikoaá ta jngoò skaya nandá kits'iì xi kjoḁkón ndaà ts'e Nainá, jè nandá xi ya nax̄i itjo-ne nga jè Nainá kitsjaà-la. Jè nax̄i, jè ngaya-la Cristo nga jè tsajmeèyakò ndiyá ñánda chinchimaya.

5 Tanga j̄ña x̄ita jchínga koi, kj̄in jchán k'en ya ñánda nangui kix̄i choòn nga Nainá mìkìi kisaseèn-takòn koni s'ín kis'iìn ngats'iì x̄ita jchínga koi, ta chibaá tsiningui-ne.

6 J̄ña kjoḁ xi k'oas'ín komà, j̄ña okóya-ná nga mì j̄ña s̄ikjaàj̄ña kjoḁ xi ch'o t̄jín koni kis'iìn j̄ña x̄ita jchínga-ná.

7 Kì k'oḁ s'ín sando xkósòn yaxkón koni kis'iìn i'nga x̄ita jchínga koi, nga k'oḁá s'ín t̄ichja Xojon-la Nainá nga tsò: “J̄ña x̄ita nax̄andá tsibìtsajna nga tsakjèn koḁ kits'iì, ikjoàn tsasítjen nga kitè [nga jè kisìtsjako xkósòn].”

8 T̄ikoaá mìkìi kjoḁ chijngui s'eén koni s'ín kis'iìn i'nga x̄ita jchínga koi, nga tà jngoò nachrjein kaàn jàn jm̄i x̄ita k'en.

9 Mì k̄i taxk̄i chít'aá Na'èn-ná koni s'ín kis'iìn i'nga x̄ita jchínga koi; k'oḁá komà-ne nga k'en nga kiskine-la ye.

10 T̄ikoaá k̄i í'ñó-ìsa tsajét'aà-là Nainá koni s'ín kis'iìn i'nga x̄ita jchínga koi. K'oḁá komà-ne nga jè àkjale-la kjoḁbiyaà kisik'en x̄ita koi.

11 Ngats'iì kjoḁ koi, k'oḁá s'ín komàt'in j̄ña x̄ita jchínga-ná kò k'oḁá s'ín kisijna ch̄iba mé-ne s̄ijiin-ná. Kisit'aà Xojon-la Nainá nga jchaá j̄ña mé kjo'in xi sinè-ná tsà k'oḁ t̄is'ín s'eén j̄ña xi titsajnakoaán nachrjein xi jye tífehèt'aà.

12 K'oaá ma-ne jè xi kòs'ín síkítsjeèn nga kixi tǐjna, kàtasíkinda yijo-la nga mì jé sakó-la.

13 Jǎnò, kj'eè mé kjoa xi mat'ioòn nga tíchìt'aà-nò xi ìsa 'ńó 'in tǐjn koni mat'in xita xi kj'eíí. Nainá, xita kixi-né, jè kàta'ńót'aà takòn nga mìkiì tsjá'nde nga ìsa tsato chít'aà-nò koni kji chíkjoako-nò. Tǐjè-ne Nainá kòkò ndiyá kós'ín kichìkjoa-nò koni s'ín tíchìt'aà-nò skanda k'e nga kjoehet'aà kjoa.

14 Jǎnò ndí 'ndsè, nǐ ìtsé kjoa ts'e xkósòn nìkítsjeèn nga mejèn-nò jchaxkón.

15 'An, k'oaá s'ín tíchjà-nò koni xita xi tǐjn-la kjohítsjeèn. Jchósòn-là 'én xi xán-nò, a kixíí kjoa.

16 K'e nga 'yooá vino xi tǐjya chítsín nga nǐjét'aà-lá Nainá nga kàtasíchikon-t'in, ¿a mìtsà ya òngásòn-koaá kò jní-la Cristo? Kò k'e nga nìxkoayaá inchrájin, ¿a mìtsà ya òngásòn-koaá kò yijo-la Cristo?

17 Jǎná, nas'ín 'ńó kǐn ma-ná, jè inchrájin xi bichiaá, ta jngoò ma-ne; k'oaá ma-ne nga ngats'iaá, ta jngoò yijo ma-ná.

18 Chítsejèn-là xita naxandá Israel, jǎná xi kine yijo-la chò xi biyaà ya ì'nde tsjeè nga tsjá-la kjotjò Nainá. Xita koi, yaá síngásòn-kò kjotjò xi tsjá-la Nainá ya ì'nde tsjeè.

19 K'e nga k'oa xan-nò, mìtsà xan-nò nga tǐjn-la okixi jǎná xkósòn kò tsojmì xi sinchát'aà-la.

20 Jǎná 'én xi xan-nò, jǎná kjotjò xi fikò jǎná xita xi mìkiì beèxkon Nainá, jǎná fikò-la inima ch'o-la nejí, mìtsà jè sobà Nainá. 'An, majìn-na nga ya síngásòn-koo inima ch'o-la nejí.

21 Mikiì ndaà tǐjn, k'e nga jye 'yò vino xi ts'e Jesús, xi otíxoma-ná, ìkjoàn s'ioo xi ts'e inima ch'o-la nejí.

Tj<sub>1</sub>koaá mìkì ndaà tj<sub>1</sub>n, k'e nga jye bichioò in<sub>1</sub>chraj<sub>1</sub>n xi ts'e Jesús, ikjoàn bichioò xi ts'e in<sub>1</sub>ima ch'o-la neíí.

<sup>22</sup> ¿A xi mejèn-nò s<sub>1</sub>ikjàn-là Na'èn-ná nga kàtach<sub>1</sub>ni? ¿A isáá tj<sub>1</sub>n-nò nga'ñó mì k'oa-ne Nainá?

*Jè k<sub>1</sub>inchátsjiaá ítjoán kj<sub>1</sub>ondaà ts'e x<sub>1</sub>ta xi kj'eíí*

<sup>23</sup> Tsò j<sub>1</sub>ñà x<sub>1</sub>ta: “Tj<sub>1</sub>'nde-né n<sub>1</sub>ta mé xi s'eén.” Kix<sub>1</sub>i kjoa tj<sub>1</sub>'nde-né, tanga mìtsà ngats'iì kjoa nga ndaà tj<sub>1</sub>n. Tj<sub>1</sub>'nde-né n<sub>1</sub>ta mé kjoa xi s'eén, tanga mìtsà ngats'iì kjoa tsjá-ná nga'ñó.

<sup>24</sup> Mìtsà tà kj<sub>1</sub>ondaà tsajòn binchaàtsjioò ítjòn, jè t<sub>1</sub>inchátsjioò ítjòn kj<sub>1</sub>ondaà ts'e x<sub>1</sub>ta xi kj'eíí.

<sup>25</sup> Maá ch<sub>1</sub>inee n<sub>1</sub>ta mé yijo xi sat<sub>1</sub>jna ya ñánda biyaà cho. Kì k<sub>1</sub>ì ch<sub>1</sub>jinanguio ñánda j'i-ne mé-ne nga mì ch'o koma-la kj<sub>1</sub>ohítsjeèn-nò.

<sup>26</sup> Nga ts'eé Na'èn-ná jè nangui k<sub>1</sub>o ngats'iì tsojmì xi tj<sub>1</sub>n-la.

<sup>27</sup> Tsà jngoò x<sub>1</sub>ta xi mìkì mokjeíin-la 'én-la Nainá, kichja-nò nga k<sub>1</sub>ichikoo, tsà mejèn-nò nga onguió, ch<sub>1</sub>jinee yije-nò xi tsjá-nò. Kì mé xi ch<sub>1</sub>jinanguio nga mì ch'o koma-la kj<sub>1</sub>ohítsjeèn-nò.

<sup>28</sup> Tsà jngoò x<sub>1</sub>ta xi k<sub>1</sub>itsò-nò: “J<sub>1</sub>ñà tsojmì koi, yaá kisinchaàt'aà-la xkòsòn.” Jè kjoa-la x<sub>1</sub>ta xi okitsò-nò, kì k<sub>1</sub>ì chine, mé-ne nga mì ch'o koma-la kj<sub>1</sub>ohítsjeèn-la.

<sup>29</sup> Mìtsà kj<sub>1</sub>ohítsjeèn tsajòn xi t<sub>1</sub>xan-nò, ts'eé x<sub>1</sub>ta xi okitsò.

Tanga tsà tj<sub>1</sub>n i'nga x<sub>1</sub>ta xi skonangui nga k<sub>1</sub>itsò: “¿Mé-ne mì tj<sub>1</sub>'nde-na nga s'iaàn n<sub>1</sub>ta mé kjoa xi mejèn-na nga ta koi kjoa-la nga mì ch'o koma-la kj<sub>1</sub>ohítsjeèn-la x<sub>1</sub>ta xi kj'eíí?

<sup>30</sup> 'An, tsà tsjaà-la kjondaà Nainá it'aà ts'e tsojmì xi kínee, mìkiì ndaà tjin tsà ch'o kito-la xita jña tsojmì xi jye kàtsjaà-la kjondaà Nainá."

<sup>31</sup> Tanga jñò, k'e nga bichioò ko tsà 'yò, nita mé kjoa xi 'nè, k'oaá s'in t'een nga jeya kàtjna Nainá.

<sup>32</sup> Kì jé binchaàtsji-là jña xita judío, ko xi mìtsà xita judío, ko jña xita naxandá-la Nainá.

<sup>33</sup> 'An, k'oaá s'in s'iaàn yije koni s'in sasén-la xita xi kj'eíí. Mìtsà jè otsjià ítjoàn xi kjondaà ts'an, jè otsjià ítjoàn kjondaà ts'e xita xi kj'eíí mé-ne nga kitjokàjìn-ne kjo'in.

## 11

<sup>1</sup> Koni s'in s'iaàn 'an nga kjingui-la Cristo, k'oa tìs'in chjinguì-ná.

*Kó s'in skoexkón x'in-la jña íchjín k'e nga chjat'aà-la Nainá*

<sup>2</sup> Ndí 'ndsè ko tichjaá, ndaà 'nè-nò nga nìkìtsjeèn it'aà ts'an ngats'iì kjoa xi s'iaàn; tikoá nìkitasòn kjo tíxoma xi 'an kisikatoya-nò.

<sup>3</sup> Tanga mejèn-na nga kàtasijìn-nò nga jngoò ìjngoò xita x'in, jè Cristo xi sko-la ma, ko jè chjoón, jè xita x'in xi sko-la ma, koni jè Cristo, jè Nainá xi sko-la ma.

<sup>4</sup> Tsà jngoò xita x'in xi tíjtsa sko k'e nga chjat'aà-la Nainá, o k'e nga chjaya 'én-la Nainá, mìkiì beèxkón Cristo nga jè tíjna sko-la.

<sup>5</sup> Tanga tsà jngoò chjoón, tsà mìkiì bíjtsa sko k'e nga chjat'aà-la Nainá, o k'e nga chjaya 'én-la Nainá, mìkiì beèxkón x'in-la nga jè tíjna sko-la. K'oaá ngaya-la koni tsà kisijno-la.

6 Tsà jngoò chjoón xi majìn-là bíjtsa sko, tikoáá-ne kátasijno-là tsja sko. Kò tsà masobà-là nga sijno-là, kàtíjtsa sko.

7 Jè xità x'in, mìkìì tjí'nde nga kùjtsa sko, nga k'oaá s'in 'ya-là koni Nainá, kò it'aà ts'e xità x'in, 'yaá-là kjoajeya-là Nainá; tanga it'aà ts'e chjoón 'yaá-là kjoajeya-là x'in-là.

8 Jè x'in, mìtsà ya itjokàt'aà-ne ts'e chjoón; jè chjoón xi it'aà ts'e xità x'in itjokàt'aà-ne.

9 Jè xità x'in, mìtsà kjoa ts'e chjoón kisindaà-ne; tanga jè chjoón, kjoa ts'e x'in kisindaà-ne.

10 Koií kjoa-là jè chjoón tjinè-là nga kùjtsa sko, seña-né nga beéxkón x'in-là, mé-ne nga tikoá skoe-ne jñà àkjale.

11 Tanga koni s'in tjindaà-là Na'èn-ná, tsà tsjin chjoón, mìkìì tíjna x'in; kò tsà tsjin x'in, mìkìì tíjna chjoón.

12 Koni s'in komà nga jè chjoón, it'aà ts'e x'in kisindaà-ne; tikoáá jè x'in, it'aà ts'e chjoón ts'in. Tanga it'aà ts'e Nainá nchrobá yije-ne.

13 Jñò, ndaà tìkítsjeèn: ¿A ndaà tjin tsà mìkìì tíjtsa sko jñà íchjín k'e nga chjat'aà-là Nainá?

14 Tíjé-ne isò'nde, bénojmya-ná nga kjoasobà-né k'e nga jè xità x'in síndojò tsja sko.

15 Tanga ndaà tsejèn k'e nga jngoò chjoón xi ndojò kjoàn tsja sko. Kjoajeya ts'e-né. Koií xá kits'i-là tsja-là nga ndojò kjoàn, mé-ne nga kùjtsa-ne sko koni tsà payo.

16 Tsà tjin xità xi mìkìì tíjngoò ikon koni bixón-jen, k'oaá s'in kátasijìn-là, ngajen kò naxandá-là Cristo, nguì k'oaá s'in 'nè-jen, tsjin xi kj'eí s'in.



*Kjoa xi mikiì ndaà tjín k'e nga bichiaá koni s'ín tsakóya Cristo*

<sup>17</sup> Nga tikjil ìsa-nò, mikiì ndaà síkítsajna-nò, koií kjoa-là nga mikiì ndaà títsa'nè k'e nga maxkóya; ch'o títsa'nè.

<sup>18</sup> Jè kjoa xi tjína ítjòn ít'aà tsajòn, k'oaá s'ín ki'nchrè, jñò xi naxandá-là Cristo 'mì-nò, k'e nga maxkóya, jò xó ya maà. Mejèn tsà mokjeiín-na tsà koií nachrjein-là tsà k'oaá s'ín títsa'nè.

<sup>19</sup> Ta xó k'oaá-la komat'in-nò nga s'eé xita xin-guioo xi sùjòya-nò, mé-ne nga jcha-là yá-ne xi tjín-là okixi.

<sup>20</sup> K'e nga maxkóya nga bichioò, koni s'ín tsakóya Cristo, mìtsà kixi kjoa nga jè níkítsjeèn-yaà koni s'ín komat'in Na'èn-ná k'e nga k'en.

<sup>21</sup> K'e nga bichioò, tjín i'nga xita xi ítjòn kjèn tsojmì xi bijchókò; mikiì koña-là xíkjin nga tsjá itsé-là; skanda tjín xi mach'i. Tanga jña xita xi i'nga, imaá ijò-là nga mikiì tsjá itsé-là.

<sup>22</sup> Jñò, ¿a tsjìn-nò ni'ya ñánda nga bichioò kò nga 'yò? ¿Mé-ne nachrjekàngui-nò xita naxandá-là Cristo koa nìsobà-là xita ima xi tsjìn-là tsojmì xi kine? K'e nga k'oas'ín 'nè, ¿kó s'ín xán-nò? ¿A ndaà síkítsajna-nò? Majìn, mikiì ndaà síkítsajna-nò.

*K'e nga jè Na'èn-ná tsakjèn-kò xita-là k'e nga kòjñò*

*(Mateo 26:26-29; Marcos 14:22-25; Lucas 22:14-20)*

<sup>23</sup> Koni s'ín tsakóya-na Na'èn-ná, ti koií-ne xi 'an tsakoòya-nò. Jè nìtjen k'e nga Na'èn-ná Jesús kitsobà'ño xita, kiskoé inchrajín,

24 kitsjaà-la kjondaà Nainá, ikjoàn kisìxkoaya, kitsò: “Chjoé, jè-né xi yijo-na nga tìtsjaà kjòtjò nga kiyá xi kjondaà tsajòn. K'oa tì s'ín t'een nga tìxkoaya inchrájin, mé-ne nga sikkítsjeèn-nò it'aà ts'an.”

25 K'oaá tìs'ín kis'iìn k'e nga jye tsakjèn, kiskoé chitsín, kitsò: “Vino xi tjiya chitsín jè, jè jní-na xi síkixiya kjoa xitse xi bìndaàjiìn-ko-nò. Jñò, k'e nga ìjngoò ìjngoò k'a s'ioo, k'oaá s'ín t'een mé-ne nga sikkítsjeèn-nò it'aà ts'an.”

26 K'e nga ìjngoò ìjngoò k'a kichioò inchrájin jè, koa s'ioya vino chitsín jè, it'aà ts'eé kjoabiyaa-la Na'èn-ná kinókjoaya, skanda k'e nga kjoí ìjngoò k'a Cristo.

### *Mikì ma taxki bichikoaá Na'èn-ná*

27 Nita yá xita-ne xi kòkjen inchrájin jè, o xi skoíya chitsín ts'e Na'èn-ná, tsà mikìl skoexkón k'e nga kòkjen, jé tíhòtsji it'aà ts'e Na'èn-ná nga tíhochrjengui yijo-la kò jní-la.

28 Koií kjoa-la, ítjòn ndaà tikítsjeèn jjiìn inima-nò kós'ín tìtsajnakoo Nainá kò xita xinguioo. Iskan tìchiod inchrájin koa t'ioya chitsín ts'e Na'èn-ná.

29 Tsà yá xita xi kòkjen inchrájin koa skoí vino xi tjiya chitsín, tsà mikìl sikkítsjeèn nga jè yijo-la Na'èn-ná, xita jè, kjo'iìn tíbínè-la yijo-la.

30 K'oaá ma-ne kjin xita xinguioo xi ch'in bí'taà-la koa tjin xi indaàkjoa tìtsajna, skanda jye kjò kjin biyaà.

31 Tsà ndaà sikkítsjeén kós'ín tìtsajnakoaá Nainá kò xita xinguiáá, Na'èn-ná mikìl kjo'in tsjá-ná.

32 Tanga tsà jè Na'èn-ná tsjá-ná kjo'in, koi-né nga mejèn-la síkixiya-ná mé-ne mikìl kòkòt'aà-ná

kjo'in xi mìkiì fehet'aà n̄ita kjé-ne xi tjoé-la j̄n̄à x̄ita isò'nde xi mìkiì beèxkón Nainá.

<sup>33</sup> K'oaá ma-ne j̄n̄ò ndí 'ndsè k'e nga maxkóya nga bichioò, chíñakjoa-là xinguioo.

<sup>34</sup> Tsà tjín i'nga xi 'ñó ijò-la, tichioò ni'ya-nò, mé-ne k'e nga koxxkóya mì kjo'in tsjá-nò Na'èn-ná. J̄n̄à kjoa xi i'nga xi tjín isa-nò, k'e k̄ijchokon-nò kíndaàj̄n̄aá.

## 12

*Kó s'ín tjín kjoa chjine xi tsjá Inima Tsjeè-la Nainá xi kjondaà ts'e naxandá-la*

<sup>1</sup> Ndí 'ndsè ko tichjaá, 'an mejèn-na kàtasij̄in-nò j̄n̄à kjoa chjine xi tsjá Inima Tsjeè-la Nainá.

<sup>2</sup> J̄n̄ò, ndaà tíj̄in-nò k'e nga tikj'eè mokjeiín-nò 'én-la Nainá, yaá tsanguit'aà-là xkósòn xi mìkiì ma chja nga xìn ndiyá k̄iiko-nò nga mìtsà kixi kjoa nga Nainá.

<sup>3</sup> K'oaá xan-nò, niyá x̄ita xi koma k̄itso-la Jesús: “¡Ch'o kàtamát'in!” tsà it'aà ts'e Inima Tsjeè-la Nainá tíchja. T̄ikoaá tsà mìtsà nga'ñó ts'e Inima Tsjeè-la Nainá tíchja, mìkiì koma k̄itso-la: “¡J̄i-né Jesús xi ot̄ixomai!”

<sup>4</sup> Ya ij̄iìn naxandá-la Nainá, k̄jìn skaya kjoa chjine tjín kjoa ts'e xá xi síkitasòn x̄ita, tanga jè xi tsjá kjoa chjine, tijè-ne Inima Tsjeè-la Nainá.

<sup>5</sup> J̄n̄à x̄ita, k̄jìn skaya xá tjín-la nga s̄ixá-la Na'èn-ná, tanga tijè-ne Na'èn-ná xi maxá-la.

<sup>6</sup> K̄jìn skaya nga'ñó tjín kós'ín maxá, tanga tijè-ne nga'ñó-la Nainá xi síxáj̄in-la ngats'iì x̄ita.

<sup>7</sup> Nga jngoò ìjngoò x̄ita, tjoé-la jngoò kjoa chjine xi okó nga yaá tíjnaj̄in inima-la Inima Tsjeè-la

Nainá mé-ne nga ngats'iì xita naxandá-la Nainá kochjeén-la kjondaà xi tjoé-la.

<sup>8</sup> Xi it'aà ts'e Inima Tsjeè-la Nainá tjin xita xi 'biì-la 'én xi tjin-la kjohítsjeèn; koa tjin i'nga xi 'biì-la 'én xi tjin-la kjoa chjine, nga tijè-ne Inima Tsjeè-la Nainá tsjá.

<sup>9</sup> Tjin xi tjoé-la kjoachjine nga ndaà mokjeiin-la nga tijè-ne Inima Tsjeè-la Nainá tsjá-la, tikoá tjin xi tjoé-la kjoachjine nga síndaà-ne xita xi xk'én, nga tijè-ne Inima Tsjeè-la Nainá tsjá-la.

<sup>10</sup> Tjin xi tjoé-la kjoachjine nga ma-la s'in kjoxon xi ndaà tjin, ko xi ma-la chja ngajo-la Nainá, ko xi machiya-la mé inima xi tísxájiin inima-la xita xi chja. Ko tjin xi tjoé-la nga ma-la chja 'én xi kj'eii tsò xi mì yá xita fiya-la, tikoá tjin xi ma-la síkatoya 'én xi kj'eii tsò xi mì yá xita fiya-la.

<sup>11</sup> Tijè ta jngoó-ne Inima Tsjeè-la Nainá xi síxá it'aà ts'e ngats'iì kjoa koi nga síka'bí-la nga jngoò ìjngoò xita kjoachjine xi jè mejèn-la nga tsjá-la.

<sup>12</sup> Yijo tsaján, kjìn jchán skaya tjin-la; tanga koni s'in tíkjoò, ta jngoò ma-ne yijo. Naxandá-la Cristo, k'oaá tis'in tjin, ta jngoò ma-ne.

<sup>13</sup> Jña xi xita judío ko xi mìtsà xita judío, xi xita chi'nda títajna ko xita xi títajnandeji ta jngoò ma-ne. Ngats'iaá jña, tà ngàsòn komaá bautizar it'aà ts'e xi tijè-ne Inima Tsjeè-la Nainá nga jngoò naxandá-la Nainá komaá koni tsà jngoò yijo. Nga jngoò ìjngoáá, Nainá kitsjaà-ná xi tijè-ne Inima Tsjeè-la.

<sup>14</sup> Jè yijo-ná, mìtsà tà jngoò skaya tjin-ne; kjìn jchán skaya tíkjoòya.

<sup>15</sup> Tsà jè ndsokoaá kitso: “An, mìtsà tsja xita ma,

mìtsà ya chjà-na jè yijo.” Mìtsà koi kjoa-la nga okìtso nga mì ya chjà-ne yijo.

16 Tsà jñà líká kìtso: “An, mìtsà xkon xita ma, mìtsà ya chjà-na jè yijo.” Mìtsà koi kjoa-la nga okìtso nga mì ya chjà-ne yijo.

17 Tsà kóhokji yijo-ná, tsà nguì xkoaán koma, ¿kós'ín kìná'ya-ná? Tsà jè yijo-ná, tsà nguì líká koma, ¿kós'ín kijne-ná?

18 Tanga Nainá nga jngoò ìjngoò skaya yijo-ná, yaá kisíkìtsajna ì'nde-la yijo-ná ñánda nga jè kjòmejèn-la.

19 Yijo-ná tsà tà jngoò skoya koma, mì-la tsà yijo xi nguì tíjngoò.

20 Kixíí kjoa nas'ín kjìn skaya tíkjoòya yijo-ná, tanga tajngoò ma-ne.

21 Jñà xkoaán mìkiì koma kìtso-la jñà ndsaá: “Mikiì mochjeén-na.” Jè skoaá tíkoaá mìkiì koma kìtso-la jñà ndsokoaá: “Mikiì mochjeén-na.”

22 Tanga it'aà ts'e yijo-ná, tjín-né xi 'mì-lá nga chiba nga'ño tjín-la tanga ìsaá ndaà mochjeén.

23 It'aà ts'e yijo-ná xi 'mì-lá nga mìkiì ndaà tsejèn, jñà-né xi níkakjá níkje mé-ne nga ìsa ndaà kotsejèn-ne. Bíjtsa'ma-né jè yijo-ná, jñà xi mìkiì tjí'nde-la nga jcha-la.

24 Mikiì mochjeén nga sijtsa'ma yijo-ná xi tsejèn. Nainá jye k'oas'ín tsibíndaà nga ìsa ndaà jchaxkón jè xi 'mì-lá nga ìsa chiba chjí-la,

25 mé-ne nga mì kojòya-ne. Ta saá nga jngoò ìjngoò skaya kàtasíkínda xíkjín.

26 Tsà tjín jngoò skaya yijo-ná ñánda ijò ma, ok'ín yije-la xíkjín kóhokji nga ma ijò. Koa tsà tjín ñánda ndaà tíyaxkón, ndaá s'e yije-la kóhokji yijo.

27 Jñò, k'oaá ngaya-la koni yijo-la Cristo. Katjín, katjín xá xi kitjoé-nò yá ijìin naxandá-la Nainá.

28 Nainá k'oaá s'ín kiskoòsòn-la mé xá xi s'iin xita: jñà títsajna ítjòn xita xi bíxáya-la Nainá; xi ma-ne jò, xita xi chja ngajo-la Nainá; xi ma-ne jàn, xita xi okóya 'én-la Nainá. Tíkoa tjín xi ma-la s'ín kjoxkón xi ndaà tjín. Kò tjín xi ma-la síndaà-ne xita xi xk'én; tjín xi ma-la síchját'aà; tjín xi otíxoma mé kjoa xi koma; kò tjín xi chja 'én xi kj'eíí tsò xi mì yá xita fiya-la.

29 Mìtsà ngats'iì nga ma bíxáya-la Nainá. Mìtsà ngats'iì nga Nainá chja ngajo-la. Mìtsà ngats'iì nga ma-la okóya 'én-la Nainá. Mìtsà ngats'iì nga ma-la s'ín kjoxkón xi ndaà tjín.

30 Kò mìtsà ngats'iì nga ma-la síndaà-ne xita xk'én. Mìtsà ngats'iì nga ma-la chja 'én xi kj'eíí tsò xi mì yá xita fiya-la. Mìtsà ngats'iì ma-la síkatoya 'én xi kj'eíí tsò xi mì yá xita fiya-la.

31 Tanga jñò, mochjeén-né nga tìnchátsjioè jñà kjoachjine xi ìsa ndaà tjín.

Tanga j'ndeí 'aán kokoò-nò jngoò ndiyá xi ìsa ndaà tjín kó s'ín sijchá yijo-nò.

## 13

### *It'àà ts'e kjoatjòcha*

1 'An, tsà ma-na chjà jñà 'én xi kj'eíí tsò xi chja xita nas'ín jñà 'én xi chja àkjale, tanga tsà tsjìn-na kjoatjòcha, nímé chjí-la; k'oaá ngaya-na koni jngoò kichà xi 'ñó one, o koni jñà kichà tsjìn xi ch'o one k'e nga kaàkjoè.

2 Tsà tsjìn-na kjoatjòcha, nímé chjí-na nas'ín ma-na chjà ngajo-la Nainá, nas'ín machiya yije-na

kjoa xi tjí'ma-la Nainá; nas'ín ma yije-na kjoa chjine, nas'ín ndaà mokjeín yije-na it'aa ts'e Nainá, skanda ma-na síkjaníyá-la nindoò.

<sup>3</sup> Tsà sika'biá yije tsojmì xi tjin-na nga kokjen xita ima, koa tsjaà kjotjoà yijo-na nga kitì xi kjondaà ts'e xita xi kje'ei, tanga tsà tsjin-na kjoatjòcha, nímé sikijne.

<sup>4</sup> Jè xita xi tjin-la kjoatjòcha, tjin-la kjoatsetakòn nità mé kjoa-ne; tjin-la kjondaà; mìkì maxitakòn; mìtsà 'én 'nga chja; kò mìtsà tijè ndaà síkjna-ne yijo-la;

<sup>5</sup> mìtsà taxkì s'ín; mìtsà tà kjondaà ts'e ótsji; mìkì taxkì majti-la; nímé kjoa bíngui takòn;

<sup>6</sup> mìtsà matsja-la it'aa ts'e kjoa xi ch'o tjin, ts'eé kjoa kixi xi matsja-la.

<sup>7</sup> Jè xi tjin-la kjoatjòcha, síkjeín yije-la nità mé kjoa-ne, mokjeín yije-la, koña yije-la, chíkjoako yije-la ngats'ì kjoa.

<sup>8</sup> Jè kjoatjòcha mìkì kjoehet'aa. Tanga kijchò nachrjein nga mì tì yá xi kichja ngajo-la Nainá, nga mì tì yá xi kichja-ne 'én xi kje'ei tsò xi mì yá xita fìya-la kò nga mì tì yá xi tjoé-la kjohítsjeèn xi tjí'ma-la Nainá.

<sup>9</sup> Nga kje'è tsà nguì ndaà tjin yije-ná kjohítsjeèn xi tjí'ma-la Nainá, kò kje'è tsà nguì ndaà nokjoà ngajo-lá Nainá.

<sup>10</sup> Tanga k'e nga kijchò nachrjein nga kjoí xi nímé chijat'aa-la, yaá kjoehet'aa jña kjoa xi ta chiba machiya-ná.

<sup>11</sup> K'e nga sa chítia, k'oaá s'ín kichjà koni chja ixti, k'oas'ín kisíktsjeèn koni s'ín síktsjeèn ixti, k'oas'ín

kiskoòsòn-là koni ixti. Tanga k'e nga jye kòjchínga, kisikíjna-ná kjoa ts'e ixti.

<sup>12</sup> I'ndeí, ta k'oaá s'ín 'yaá Nainá koni tsà chitsín jmà chítsejèn-yaá nga mìkiì ndaà tsejèn-ná. Tanga kijchò nachrjein k'e nga ndaà kotsejèn-ná nga chí'aán Nainá. I'ndeí ta chibaá machiya-na, tanga kijchò nachrjein nga ndaà kochiya-na koni s'ín beèxkon-na Nainá.

<sup>13</sup> Ján kjoa tjín xi mìkiì kjoehet'aà, jngoò kjoa nga mokjeiín-ná it'aà ts'e Nainá, ìjngoò nga chiñà-lá xi tjoé-ná, ìjngoò nga s'e-ná kjoatjòcha. Jñà ingajàn kjoa koi, jè kjoatjòcha xi ìsa 'ñó chjí-là.

## 14

### *Jè xi ma-là chja 'én xi kj'eíí tsò*

<sup>1</sup> Jè kjoatjòcha tanguítjìngui-là; tìkoa mochjeén-né nga tìnchátsjioò jñà kjoachjìne xi tsjá Iníma Tsjeè-là Nainá. Kò jè xi ìsa 'ñó mochjeén nga kìnókjoa ngajo-là Nainá.

<sup>2</sup> Jngoò xítà xi kj'eíí tsò 'én xi chja, mìtsà taxkì xítà tíchja-là; Nainá tíchjat'aà-là. Nga mì yá xítà fíya-là kó tsò 'én xi tíchja. Jñà 'én xi chja, ts'eé Iníma Tsjeè-là Nainá nga tíchja'ma-né.

<sup>3</sup> Tanga jè xítà xi chja ngajo-là Nainá, jñà xítà naxandá-là Nainá chjajìin-là, mé-ne nga ìsa ndaà koma-là, ìsa ndaà kò'ñójìin-ne kjo'hítsjeèn-là koa ìsa ndaà sìije takòn-ne xítà naxandá-là Nainá.

<sup>4</sup> Jè xítà xi chja 'én xi kj'eíí tsò xi mì yá xítà fíya-là, tì yijo-laá tsjá nga'ñó-là. Tanga jè xi chja ngajo-là Nainá, jñà xítà naxandá-là Cristo tsjá-là nga'ñó.

<sup>5</sup> 'An, k'oaá s'ín mejèn-na tsà ngats'ioò koma-nò kìnókjoa 'én xi kj'eíí tsò xi mì yá xítà fíya-là. Tanga



Ìsaá-la ndaà tǵín tsà koma-nò kìnókjoa ngajo-là Nainá. Jè xi Nainá chja ngajo-la Ìsaá 'ńó chǵí-la mì k'oa-ne koni jè xi chja 'én xi kǵ'eǵí tsò. Ta jngoó-la tsà tǵín xǵita xi koma-la sǵikatoya 'én xi kǵ'eǵí tsò mé-ne Ìsa ndaà s'e-la nga'ńó xǵita naxandá-la Cristo.

<sup>6</sup> Ndí 'ndse ko tichjaá k'oaá ngaya-la tsà 'an mejèn-na kǵikon-nò, tsà kǵ'eǵí tsò 'én xi kichjàkò-nò xi mìkìl na'yà-là, kós'ín kochjeén-nò. Ta jé-la tsà 'én-la Nainá sikǵichya-nò, tsà kènǵjmí chiba-nò kǵohǵtsjeèn xi ndaà tsò, tsà kichjàjǵìn-nò 'én kixǵi, ko kokoòya-nò 'én xi ndaà tsò.

<sup>7</sup> Jǵnà chrjo-la música ko ní'ńó xi tíhone tsà ngásòn kǵjone, ǵkós'ín jcha-la ńá-laá xi tíhone nga tà ngásòn tsò?

<sup>8</sup> Tsà jè chrjo trompeta-la xǵita kǵojchán, tsà mìkìl ndaà skǵindàya, ǵyá xǵita xi kǵitsajnandaà nga kǵoj kǵojchán?

<sup>9</sup> Jǵnò, k'oaá tǵs'ín mat'ioòn tsà mìtsà 'én tsajòn kìnókjoaa nga kǵjya-la xǵita, ǵkó s'ín kǵiná'ya-la mé 'én xi tǵtsanokjoà? Tà jǵjǵìn Ìsén-la tǵtsanokjoà.

<sup>10</sup> Kǵjìn jchán skoya 'én tǵjín nga tǵjtsa Ìsò'nde, tanga ngats'ì 'én tǵjín-la kǵohǵtsjeèn kó tsòya-ne nga jngoò Ìngoò skoya.

<sup>11</sup> 'An, tsà mìkìl fiya-na kó tsò 'én xi tíchja jngoò xǵita, xǵita xǵìn nanguí koma-na. Ko jè xǵita xi tíchja, k'oaá tǵi koma-la Ìt'aà ts'an koni xǵìn nanguí Ì'nde-na.

<sup>12</sup> Jǵnò, nga mejèn-nò jǵnà kǵjoachjǵne xi tsjá Inǵma Tsjeè-la Nainá, mochjeén-né nga Ìsa ndaà tǵinchǵtsjioè jǵnà kǵjoachjǵne xi koma ndaà sǵichjǵt'aà-la naxandá-la Cristo mé-ne nga Ìsa tse nga'ńó s'e-la.

13 K'oaá ma-ne jè xita xi kj'eíj tsò 'én xi chja xi mì yá xita fiya-la, kàtasíjèt'aà-la Nainá nga kàtatsjá-la kjoachjine mé-ne koma síkatoya-ne 'én xi chja.

14 'An, k'e nga chjàt'aà-la Nainá nga kj'eíj tsò 'én xi tichjà xi mìkì fiya-na, tà jè tíchja Inima Tsjeè-la Nainá xi tíjnajiìn inima-na. Tanga jè kjohítsjeèn-na, nímé kjondaà sakò-la nga mìkì fiya-na kó s'ín tichjà.

15 'An, ¿mé xi s'iaàn? Mochjeén-né nga kichjàt'aà-la Nainá 'én xi bíjiìn inima-na Inima Tsjeè-la Nainá. Tíkooá mochjeén-né nga kichjàkooa Nainá 'én xi ndaà fiya-na. K'e nga seè, tíkooá mochjeén-né nga seè sò xi bíjiìn inima-na Inima Tsjeè-la Nainá. Tanga tíkooá mochjeén nga seè sò xi ndaà fiya-na.

16 K'e nga jeya nìkíjni Nainá, tsà tà jñà 'én nokjoì xi bíjiìn inima-lè Inima Tsjeè-la Nainá, tsà kji'nchré-la 'én-lè jñà xita xi mìkì fiya-la, mìkì koma kítsò: “K'oaá s'ín kàtama”, nga mìkì fiya-la kó tsò 'én xi nokjoì.

17 Okixi-né, kjondaà xi tì'biì-la Nainá, ndaà tjín, tanga jñà xita xi i'nga, nì mé nga'ño tísakó-la nga mìkì fiya-la.

18 'An, tsjaà-la kjondaà Nainá nga isaá ndaà ma-na chjà 'én xi mì yá xita fiya-la mì k'oa-ne koni jñò.

19 Tanga k'e nga ya tíjnajiìn-la xita naxandá-la Cristo, isaá ndaà tjín tsà tà 'òn 'én kichjà xi tjín-la kjohítsjeèn nga kokoòya-la xita, mì k'oa-ne tsà te jmù 'én kichjà xi kj'eíj tsò xi mìkì 'nchréya-la xita.

20 Ndí 'ndsè kò tichjaá, kì k'oaá s'ín nìkítsjeèn koni ixti. Tanga ts'e kjoa xi ch'o tjín, k'oaá s'ín t'een

koni ixti xi kj'eè ndaà machiya-la. Tanga it'aà ts'e kjohítsjeèn-nò, k'oaá s'ín t'een koni xita xi jye ndaà machiya-la.

<sup>21</sup> Xojon-la Nainá k'oaá s'ín tichja nga tsò: “Nga kichjà-la naxandá-na, xita xìn nanguií síkjeén xi kj'eíí 'én chja nga koma kichja-la. Tanga nas'ín k'oas'ín s'iaàn mìkì kji'nchréñijon-na, tsò Na'èn-ná.”

<sup>22</sup> K'e nga nokjoá 'én xi kj'eíí tsò xi mì yá xita fiya-la, kjoxkón okó-la Nainá jñà xita xi mìkì mokjeiín-la, mìtsà ts'e xita xi mokjeiín-la. Tanga k'e nga nokjoà ngajo-lá Nainá, ts'eé xita xi mokjeiín-la, mìtsà ts'e xita xi mìkì mokjeiín-la.

<sup>23</sup> Jñà xita naxandá-la Cristo k'e nga maxkóya, tsà ngats'iì nga kj'eíí 'én kichja xi mì yá xita fiya-la, tsà kjoahas'en jngoò xita xi taxki xita xi mìkì mokjeiín-la 'én-la Nainá, kित्सो-né: “Jñá xita koi, xita ská-né.”

<sup>24</sup> Tanga tsà ngats'ioò nga 'én-la Nainá titsanokjoáya ngajo-lá, tsà kjoahas'en jngoò xi taxki xita xi mìkì mokjeiín-la 'én-la Nainá, k'e nga kji'nchré-nò, kokjeiín-la kò kochiyaá-la nga xita jé-né.

<sup>25</sup> Jè kjoa xi tíjna'ma jjiìn inima-la, jchaá-la; kò jè xita, kosijna-xkó'nchi-la Nainá nga skoexkón; kokjeiín-la nga kixi kjoa nga ya tíjnajiìn-nò Nainá.

*Okixi xi kitsjaà Pablo kó s'iin xita k'e nga maxkóya nga jeya síkijna Nainá*

<sup>26</sup> Jñò ndí 'ndsè kò tichjaá, ¿kó s'ín fiya-nò jñà 'én koi? Tsòyaá-ne, k'e nga maxkóya nga jeya nìkijna Nainá, tjín i'nga xita xinguiqo xi seè-la Nainá; tjín i'nga xi ma-la okóya 'én-la Nainá; tjín xi ma-la

bénojmí 'én xi jye tsakó-la Nainá; tjín xi chja 'én xi kj'eíí tsò xi mì yá xita fíya-la; tikoáá tjín xi ma-la síkatoya 'én xi kj'eíí tsò. Ngats'ii xá koi, k'oaá s'ín kàtabitasòn mé-ne nga isa ndaà s'e-la nga'ño inima-la jña xita naxandá-la Nainá.

<sup>27</sup> Tsà tjín xita xi ma-la chja 'én xi kj'eíí tsò xi mì yá xita fíya-la, tà jò kò tsà jàn kichja; tanga ta lingoò lingoò kichja; kò jngoò xi sikkatoya 'én koi.

<sup>28</sup> Tsà tsjín xita xi ma-la síkatoya, tà jyò kàttsajna nga nguixkon naxandá-la Cristo, tikoáá-ne tà jjiin inima-la kàtichjako Nainá.

<sup>29</sup> K'oaá tis'ín tjín ts'e xita xi chja ngajo-la Nainá, tà jò-ne kò tsà jàn xi kichja. Jña xita xi i'nga, tà kji'nchré-né; ta sisingàsòn-kjoò-né a ndaà tjín, o xi majin-né.

<sup>30</sup> Jña xita xi títsajna, tsà kitjokàjjiin jngoò xita xi Nainá sikkichiya-la 'én xi mejèn-la nga kichja, jè xita xi tíchjaya tikoáá-ne ta jyò kàtjina, kàtatsjá'nde-la nga jè kàtichja.

<sup>31</sup> K'oaá ma-ne, ngats'ioò xi ma-nò nokjoà ngajo-la Nainá komaá kinókjoa nga lingoò lingoò-nò mé-ne nga isa ndaà koma-nò kò isa ndaà kotsja-nò ngats'ioò.

<sup>32</sup> Jña xita xi ma-la chja ngajo-la Nainá, mochjeén-né nga tijnã skósòn-la kós'ín kichja.

<sup>33-34</sup> Nga Nainá, jè xi mejèn-la nga s'e kjoa'nchán, majin-la nga kjoasii s'e.

Jña íchjín, jyò kàttsajna, koni ma ngats'ii naxandá-la Cristo ñánda maxkóya xita-la; mikii tíj'nde nga kichja; ndaà kàta'nchréñijon koni s'ín tíchja kjotíxoma.

<sup>35</sup> Tsà mé kjoa xi mejèn-la nga skoe, yaá ni'ya-la

kàtakjònangui-là x'in-là. Mìkìl ndaà tjín tsà jngòò chjoón kichjajìin ñánda maxkóya xita naxandá-là Nainá.

<sup>36</sup> ¿A k'oaá s'ín níkítsjeèn nga ta it'aà tsajòn kisin-daà 'én-là Nainá? ¿A k'oaá ma-nò tsà ta jñò-nó xi kitjoé-nò?

<sup>37</sup> Tsà tjín i'nga xita xinguiòo xi k'oas'ín síkítsjeèn nga ma-là chja ngajo-là Nainá, o xi ndaà machiya-là kjohítsjeèn-là Inima Tsjeè-là Nainá, k'oas'ín kàtakixiya-là nga jñà 'én xi tikjià-nò, kjotíxoma ts'eé Na'è-ná.

<sup>38</sup> Tsà tjín xita xi mìkìl sasén-là koni s'ín okoòya-nò, tikoáá Nainá mìkìl sasén takòn xita jè.

<sup>39</sup> Ndí 'ndsè kò tichjaá, k'oaá s'ín 'nó tinchátsjioò nga tinókjoá ngajo-là Nainá; tanga kì bìtsajna ikòn-là jñà xi ma-là chja 'én xi kj'eíj tsò xi mì yá xita fiya-là.

<sup>40</sup> Tanga ngats'ii kjoá koi, nguì ndaà t'een, kixi tanguíkoo.

## 15

### *K'e nga jaáya-là Cristo*

<sup>1</sup> I'ndeí ndí 'ndsè kò tichjaá, 'an mejèn-na nga síkítsjeèn-nò jè 'én ndaà-là Nainá xi kjoá ts'e Cristo xi 'an kichjàyajiìn-nò xi kichjoétjò kò nga kixi titsajnakoo.

<sup>2</sup> Jè 'én ndaà-là Nainá xi kjoá ts'e Cristo xi koma kochrjejiìn-nò kjo'in tsà kixi titsajnakoo skanda i'ndeí koni s'ín nga kichjàyajiìn-nò nga tisa ítjòn; tsà majìn, nímé chjí-là nga kòkjeíin-nò.

<sup>3</sup> Jè kjoa xi isa 'ño tjín, jè-né nga kos'ín tsakoóya-nò koni tjín xi 'an kitjoé-na, nga jè Cristo k'en ngajo-ná xi kjoa ts'e jé-ná nga k'oaá s'ín tíchja Xojon-la Nainá;

<sup>4</sup> nga kisìhjiin, koa nga ijchò jàn nachrjein jaáya-la, koni s'ín tíchja Xojon-la Nainá.

<sup>5</sup> K'e nga jaáya-la, tsakó-la yijo-la jè Cefas [tijè-ne Pedro], ikjoàn tsakó-la yijo-la jña xita-la xi i'nga, ya tejò ma-ne ko Pedro.

<sup>6</sup> Xi komà iskan, tsato 'òn sìndo ma-ne xita 'ndsè xi títsajnajtín nga tsakó-la yijo-la. Jña xita koi, tjín i'nga xi jye k'en, tanga kjin ma xi tákó títsajnakon skanda i'ndeí.

<sup>7</sup> Ikjoàn tsakó-la yijo-la jè Jacobo. Xi komà iskan tsakó yije-la yijo-la jña xita-la xi tsibíxáya-la.

<sup>8</sup> Xi jyehet'aà-ne, ikjoàn 'aán tsakó-na yijo-la. 'An, k'oaá s'ín ngaya-la koni tsà jngoò ki'ndí xi mì jé nachrjein kits'iin koni s'ín chíya nachrjein-la.

<sup>9</sup> 'An-ná xi isa 'ño nangui tijn-la kóhotjín jña xita xi tsibíxáya-la Jesús. Skanda mìkiì ok'in-na nga k'oas'ín k'oín-na; nga 'aán kiitjingui kondra-la jña xita naxandá-la Cristo.

<sup>10</sup> Tanga jè kjondaà-la Nainá ndaà tsasiko-na; k'oaá komà-ne nga 'an tsibíxáya-na. Jè kjondaà-la, mìtsà tà kjotjò kitsjaà-na. Tanga 'an, isaá 'ño kisixá mì k'oa-ne koni ngats'iì xita-la xi i'nga. Kixíí kjoa, mìtsà nga ñó ts'an, kjondaà ts'eé Nainá.

<sup>11</sup> Tsà 'an-ná, ko tsà jña xita-la xi i'nga xi ndaà síxá, tanga jè xi chjí-la nga k'oa s'ín nokjoàya-jen, koa jño, k'oaá s'ín mokjeiín-nò.

*K'e nga kjoaáya-la jña xita xi jye k'en*

12 K'oaá s'ín t́nokjoáya nga jè Cristo jaáyajìn-la xítà xi jye k'en, tanga, ÷mé-ne t́jín i'nga-ne xítà xinguióo xi tsò: “Jńà xítà xi jye k'en mì t́ kù kjoáya-la.”?

13 Tsà mìkì kjoáya-la xítà xi jye k'en, t́kooá jè Cristo, mì-la tsà kixì kjoa nga jaáya-la.

14 Tsà mìkì jaáya-la Cristo, jńà 'én xi nokjoàya-jen nímé-la chjí-la, t́kooá nímé-la chjí-la koni s'ín mokjeiín-nò.

15 T́kooá ngajen, xítà ndisoó kítjokàngui-jen it'aà ts'e Nainá, nga k'oaá s'ín nokjoàya-jen 'én-la Nainá nga bixón-jen: “Jè Nainá kisìkjaáya-la Cristo.” Nga tsà jńà mìk'en mìkì kjoáya-la, mì-la tsà kixì kjoa nga kisìkjaáya-la Cristo.

16 Tsà jńà xítà xi jye k'en mìkì kjoáya-la, t́kooá jè Cristo mì-la tsà kixì kjoa nga jaáya-la.

17 Jè Cristo, tsà mìkì jaáya-la, nímé-la chjí-la koni s'ín mokjeiín-nò it'aà ts'e, tákó yaá-la titsajnajñoò jé-nò.

18 T́kooá jńà xítà xi jye k'en nga kòkjeiín-la it'aà ts'e Cristo, jngoò k'aá-la kichijà, tsà mì jaáya-la Cristo.

19 Jè kjoa xi chińà-lá it'aà ts'e Cristo, tsà tà jí isò'nde kjoehet'aà, jńà-la xi nguì xítà ima 'mì-ná kó ngats'ìi xítà xi t́jín isò'nde.

20 Tanga nguì kixí kjoa nga jè Cristo jaáyaá-la it'aà ts'e kjoa biyaà. K'oaá ngaya-la koni tsojmì xi majchá ítjòn, nga jè Cristo jaáya ítjòn-la ngats'ìi xítà xi iskan kjoáya-la [nga mì t́ kù kiyá-ne].

21 Koni s'ín komà nga it'aà ts'e jngoò xítà kjòts'ia nga biyaà xítà, k'oaá t́s'ín komà nga it'aà ts'e jngoò xítà j'ìi nga kjoáya-la xítà xi jye k'en.

22 Koni s'ín ma nga biyaà ngats'ìì xità xi ìt'aà ts'e tje-la Adán kits'ìn, k'oaá tis'ín ma nga kjoaáyaá-la ngats'ìì xità xi ìt'aà ts'e Cristo ts'ìn xitse-ne.

23 Tanga jngoò ìjngoò 'ncha ndiyá-né nga kjoaáya-la koni s'ín oko-la. Jè Cristo, tíjna ítjòn nga jaáya-la; k'e nga kjoíí ìjngoò k'a Cristo, k'ée kjoaáya-la xi xità ts'e.

24 Cristo, ítjòn sìikjehesòn ngats'ìì xi kondra fi-la, ngats'ìì xi títsajna ítjòn, xi tjín-la nga'nó ko xi otíxoma. Ikjoàn jè Cristo sìingatsja kjoíxoma-la Nainá xi Na'én-ná ma; k'ée kjoehet'aà isò'nde.

25 Mochjeén-né nga jè Cristo kátatíxoma skanda k'e nga jye sìikítsajnangui yije ndsoko jña xi kondra-la.

26 Ko jè kondra-la xi fehet'aà-ne nga chija, jé kjoa biyaà.

27 Nità mé xi tjín, Nainá, yaá kisikítsajnangui yije ndsoko Cristo. Jè tíhotíxoma yije-la. Tanga mìtsà tsò-ne kjoa nga jè Nainá, yaá tíjnangui ndsoko Cristo. Nga jè sobá Nainá xi kisikítsajnangui ndsoko nità mé xi tjín.

28 K'e nga jye ya títsajnangui yije ndsoko Cristo nità mé xi tjín, jè Cristo, nga Kí'ndí-la Nainá ma, tíkoaá nangui sìikíjna yijo-la nga nguixkon Nainá nga jè sobá Nainá tsibítsajnangui ndsoko Cristo nità mé xi tjín, mé-ne nga jè Nainá jngoò k'aá jè kíjna ítjòn-la nità mé kjoa-ne.

29 Tanga tsà jña xità xi jye k'en mì tì kii kjoaáya-la, jña xità xi ìt'aà ts'e mik'en ma-ne bautizar, ¿kó s'ín síkítsejèn? ¿Mé-ne ìt'aà ts'e mik'en ma-ne bautizar, tsà kixi kjoa nga mì tì kii kjoaáya-la xità?



30 Kò ngajen, ¿mé kjoa-ne nga nachrjein nchijòn binchaxkón-lajen yijo-najen, tsà mì tì kii kjoaáya-la xità?

31 Ndí 'ndsè kò tichjaá, k'oaá xan-nò nga nguì kixíí kjoa nga nachrjein nchijòn tjín-na kjoaxkón tsà ya kiyá, koni s'ín nga nguì kixíí kjoa nga mat-sja-na it'aà tsajòn nga ngásòn mokjeiín-ná it'aà ts'e Na'èn-ná Jesucristo.

32 Tsà tà jñà kjoa ts'e isò'nde-né nga kiskaàn-koa xità koni tsà xa ján Éfeso, ¿mé xi kisikijne? Tsà jñà xità xi jye k'en mì tì kii kjoaáya-la, tìkoaá-ne: “Kìchiaá, s'ioaá nga nchijòn-lè kiyá-ná.”

33 Kì yá xità xi konachan-nò it'aà ts'e kjoa koi. Nga tjín jngò 'én xi tsò: “Jñà xità xi tsjahijtakoáá xi mìkii ndaà s'ín, jñà síkits'ón-jìin kjoa xi ndaà tjín koni s'ín tìtsanjchá yijo-ná.”

34 Ndaà tìkítsjeèn it'aà ts'e kjoa koi; kì tà tsjaà jé binchaàtsjioò. Nga tjín i'nga xità xinguiòò xi mìkii beèxkon Nainá. K'oaá xan-nò mé-ne nga kàtasobà-nò.

### *Kó kjoàn koma mìk'en k'e nga kjoaáya-la*

35 Tsà koi nachrjein-la tjín i'nga xità xi tsò: “¿Kós'ín koma nga kjoaáya-la xità xi jye k'en? ¿Kó kjoàn yijo xi kítjokàjìin-ko?”

36 ¿Mé tà tònò-nò! K'e nga 'bè tje, jñà nojmé nga sihiìin, biyaà-né, mé-ne nga kiso xitse-ne jno, nga ìjngò k'a kítsajnakon.

37 K'e nga 'bè tje, mìtsà jñà xi jye jno bitjèe; tà jñà nojmé bitjèe, o xi trigo-né.

38 Tanga jè Nainá, k'oaá kjoàn s'ín koni s'ín mejèn-la; k'oaá kjoàn s'ín nga jngò ìjngò skaya xojmá koni kjoàn tje-la.

39 Jñà yijo, mìtsà ngàsòn kjoàn. Yijo-la x̄ita, kj'eíí kjoàn; yijo-la cho, kj'eíí kjoàn; yijo-la t̄in, kj'eíí kjoàn; yijo-la n̄ise, kj'eíí kjoàn.

40 Koni choòn ī isò'nde nga t̄jín yijo xi kj'eíí s'ín tsejèn, k'oaá ti choòn ngajmìi nga t̄jín xi kj'eíí s'ín tsejèn. Mìtsà ta ngàsòn tsejèn xi t̄jín ngajmìi ko xi t̄jín isò'nde.

41 Jè ts'oi kj'eíí s'ín tsejèn, jè sá kj'eíí s'ín tsejèn, jñà ni'ño kj'eíí s'ín tsejèn. K'a kj'eíí, k'a kj'eíí s'ín tsejèn nga jngoò òjngoò skoya.

42 K'oaá t̄is'ín ma nga kjoaáya-la x̄ita xi jye k'en. Jè yijo xi sihiijìn, bits'on-né, t̄anga jè yijo xi kjoaáya-la, m̄i t̄i k̄i k̄its'ón-ne.

43 Sihijìn-né xi n̄imé ch̄jí-la; jè xi kjoaáya-la jeya-né. Xi sihiijìn, yijo indaà-né; xi kjoaáya-la t̄jín-la nga'ño.

44 Jè yijo xi sihiijìn, taxk̄i yijo-né, ts'e isò'nde-né. Yijo xi kjoaáya-la, yijo x̄itse-né, ts'eé In̄ima Tsjeè-la Nainá. T̄jín xi taxk̄i yijo, t̄ikoá t̄jín xi tsjá In̄ima Tsjeè-la Nainá.

45 K'oaá s'ín t̄íchja Xojon-la Nainá nga tsò: “Jè x̄ita x'ín t̄jòn xi ki'mì Adán, jngoò xi x̄ita komà xi tsibìjnakon.” T̄anga [jè Cristol], jngoò in̄ima xi s̄íkítsajnakon x̄ita, nga jè j'ì ngajo-la Adán nga jyehet'aà-ne kjoá.

46 Tanga jè xi in̄ima, mìtsà jè j'ì ítjòn; jè j'ì ítjòn xi taxk̄i yijo ts'e isò'nde, iskaán j'ì xi in̄ima.

47 Jè x̄ita x'ín xi t̄jòn, ī it'aà nangui ts'e; ni'ndeé kisindaà-ne. Jè x̄ita x'ín xi ma-ne jò, ngajmìi ts'e, yaá inchrobà-ne, [nga jè xi Na'èn-ná].

48 Ngats'ìi x̄ita xi ī isò'nde ts'e, k'oaá kjoàn yijo-la koni kji ts'e Adán nga ni'ndeé kisindaà-ne. Ngats'ìi

xi ngajmì kítsajna, k'oaá kjoàn koma yijo-la koni kji ts'e Cristo xi ngajmì inchròbà-ne.

<sup>49</sup> I'ndeì, jñá, k'oaá kjoàn tsejèn yijo-ná koni kji xi ni'nde kisindaà-ne; nga komà iskan, k'oaá kjoàn kotsejèn yijo-ná koni kji xi ngajmì j'ì-ne.

<sup>50</sup> Ndí 'ndsè, k'oaá xan-nò jè yijo-ná nga jní tjín-la mìkì ma kjoahas'en-jìin ñánda tíhotíxoma Nainá. Tíkoaá jè yijo-ná xi bi'ndoya mìkì ok'ìn-la nga ya kjoahas'en-jìin ñánda tjín xi mìkì bi'ndoya.

<sup>51</sup> Kènojímí jngoò-nò kjoa'ma ts'e Nainá: Jñá xi xità-la Cristo 'mì-ná, mìtsà ngats'iaá nga kiyá, tanga ngats'ì-ná ta jngoò tjo kjoatjìya-ná,

<sup>52</sup> k'oaá ngaya-la koni k'e nga tsíx'aá koa bíchjoà xkoaán, tik'eé-ne nga skindàya chrjo trompeta xi fehet'aà-ne. K'e nga kjone chrjo trompeta, jñá mik'en kjoáya-la, mì tì kii kì'ndo-ne nità kjé-ne. Koa jñá kjoatjìya-ná.

<sup>53</sup> Jè yijo-ná nga biyaà ko nga bi'ndo, mochjeén-né nga tjoé jngoò-la yijo xi mì tì kii kiyá-ne ko mì tì kii kì'ndo-ne nità kjé-ne.

<sup>54</sup> K'e nga k'oas'ín koma nga jè yijo-ná tjoé jngoò-la yijo xi mì tì kii kiyá-ne ko mì tì kii kì'ndo-ne nità kjé-ne, k'eé kítasòn koni s'ín tíchja Xojon-la Nainá nga tsò: “Jè kjoa xi síkijne jngoò k'aá síchija kjoabiyaà.

<sup>55</sup> Ji xi kjoa biyaà 'mì-lè, ¿ñánda-ne nga kinìkijni? ¿Ñánda tjina na'yá-lè xi ma-la sík'en xità?”

<sup>56</sup> Jè na'yá xi tjín-la kjoa biyaà, jé kjoa ts'e jé. Ko jè nga'ño xi tjín-la jè kjoa ts'e jé, jé kjoatíxoma.

<sup>57</sup> Ndaà chjí-la Nainá nga jè tsjá-ná nga'ño xi it'aà ts'e Jesucristo xi otíxoma-ná nga nìkijne-lá kjoa biyaà ko kjoa ts'e jé.

58 Jñò ndí 'ndsè xi matsjake-nò, kixi tìtsajna. Niyá xi s̀ìk̀jatjya-la kjoh̀tsjeèn-nò. Kjit'aà nàchrjein isa 'nó tixá-là Nà'èn-ná. Nga tíjìn-nò nga jè xá xi 'nè xi ts'e Nà'èn-ná, mitsà tà kjotjò.

## 16

### *Ton xi maxkót'aà-la jñà xita naxandá-la Cristo*

1 Jè ton xi maxkót'aà-la xita naxandá-la Cristo, k'oas'ín t'een koni s'ín kixan-la xita naxandá-la Nainá ján nangui Galacia.

2 Jñò, nga jngoò ìjngoò, nga jìn jìn nàchrjein k'e nga tahàngo, titjò chiba ton-nò koni s'ín machikon-t'ioòn, mé-ne nga mì k'e kíxkó-nò k'e nga 'an xi kijchoa.

3 K'e nga kijchokon-nò ya Corinto, s̀ikasén ján Jerusalén xita xi jñò chjaajñò. Tsjaà-la xojon carta nga kjiqo jè ton xi maxkót'aà-nò.

4 Tsà mochjeén nga tikoá 'an kjián, komaá kjiqo-na jñà xita koi.

### *K'e nga kisik̀tsjeèn Pablo nga kjoj ján Corinto*

5 Mejèn kjíkon-nò k'e nga jye kjoáhatoaa ján nangui Macedonia, nga k'oaá s'ín tíndaà-na nga ya kjoáhatoaa mé-ne nga ikjoàn kjiqo-na Corinto.

6 Tsà koma ya kótijnako chiba nàchrjein-nò, ko tsà koií nàchrjein-la nga ya kótijnako-nò skanda k'e nga kjoehet'aà nàchrjein-la chon 'nchán, mé-ne jñò koma sichját'aà-ná k'e nga tsà ñánda kjián nga koma iskan.

7 Majìn-na nga tà jngoò tjò skotsejèn-nò; jè xi mejèn-na nga kjìn nàchrjein kótijnako-nò, tsà Nainá mejèn-la nga tsjá'nde-na.

<sup>8</sup> Í kótijna naxandá Éfeso skanda naxrjein ts'e s'eí Pentecostés, [jè s'eí xi bitjo k'e nga jye bijchó icháte naxrjein nga bitjo s'eí Paxko].

<sup>9</sup> Ndaà títjo'nde-na nga tís'iaàn xá-là Nainá xi 'ñó ndaà tíbitasòn, nas'ín 'ñó kjìn ma-ne xitá xi kondra títsajna-na.

<sup>10</sup> Tsà kijchòkon-nò jè Timoteo, chítsejèn-là nga tsja kátas'e-là nga kíjnakò-nò nga mì yijo-là kinchaxkón-là, nga tikoá xá-là Nainá tís'ín koni 'an.

<sup>11</sup> K'oaá ma-ne, kì nachrjenguioò jñò, tã saá tichját'aà-là nga 'nchán kàtjanchrobákon-na; 'an, tíkoñaá-là kò xitá 'ndseé xi i'nga.

<sup>12</sup> 'An 'ñó tsibìtsi'ba-là jè 'ndsè Apolos, nga katahíjtakò jñà xitá 'ndseé xi tjinè nga kjìkon-nò, tanga majìn-là nga fi; k'eé-la kjoì k'e nga kò'a-là.

<sup>13</sup> Ndaà titsajnakon. 'Ñó kixi titsajnakoo jè 'én xi mokjeiín-nò. Kì yá xi tsakjoòn-là, kátas'e-nò nga'ñó.

<sup>14</sup> Ngats'ìi kjoá xi 'nè, koo kjoatjòcha-nò k'oa t'een.

<sup>15</sup> Jñò ndí 'ndseé kò tichjaá, jyeé tíjìn-nò nga jñà xitá ni'ya-là Estéfanos, jñà kòkjeiín ítjòn-là 'én-là Cristo ya nangui Acaya. Jñà xitá koi, k'oaá s'ín bìnè-là yijo-là nga jñà xitá naxandá-là Cristo sìichját'aà-là.

<sup>16</sup> Ndí 'ndsè, bìtsi'bà-nò nga tiná'yañijon-là xitá xi k'oas'ín síxá koni jñà xitá koi, kò ngats'ìi xitá xi mìkìi bijta-là nga síxá-là Nainá.

<sup>17</sup> Matsja-na nga j'ìikon-na Estéfanos, Fortunato kò Acaico [nga jñò kinikasén], nga jñà j'ìi síkitasòn xi jñò mìkìi komà kinìtasòn nga inchrobàchon-ná.

18 Jñà j'ì sije ikon-na kò tsajòn. K'oaá ma-ne jchaxkón jñà xita xi k'oas'ín s'ín koni jñà xita koi.

*Pablo síhixat'aà naxandá-la Cristo*

19 Jñà naxandá-la Cristo xi títsajna nangui Asia síhixat'aà-nò. Jè Aquila kò Priscila kò xita naxandá-la Cristo xi bixoña ya ni'ya-la, it'aà ts'e Na'èn-ná ndaà síhixat'aà-nò.

20 Ngats'ìi xita 'ndseé, síhixat'aà-nò. Jñò tixat'aà nga jngoò ijngoò xita xinguiqo nga kò inima-nò.

21 'An, xi Pablo 'mì-na, tishixat'aà-nò nga kò ndsaa tikjiì-nò xojon jè.

22 Tsà tjin xita xi mìkì matsjakeè Jesucristo xi otíxoma-ná, jè xita nejí kàtjiko. Na'èn, ji nìton nchroboí.

23 Jè kàtijnako-nò kjondaà-la Jesucristo xi otíxoma-ná.

24 Kjit'aà nachrjein kàtas'e-nò kjoatjòcha-na nga jè Cristo Jesús titsajnakoá. K'oaá s'ín kàtama.

**Mazatec, San Jerónimo Tecóatl**  
**New Testament in Mazatec, San Jerónimo Tecóatl**  
**Mazateco de S Jeronimo Tecoatl; maa**  
**(MX:maa:Mazatec, San Jerónimo Tecóatl)**

copyright © 2012 Wycliffe Bible Translators, Inc.

Language: Mazatec, San Jerónimo Tecóatl

Translation by: Wycliffe Bible Translators, Inc.

Contributor: Bible League International

Mazateco, San Jerónimo Tecóatl [maa], Mexico

**Copyright Information**

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mazatec, San Jerónimo Tecóatl

**© 2012 Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-05-10

---

PDF generated using Haiola and XeLaTeX on 10 May 2025 from source files dated 10 May 2025

9f778253-d34e-5037-af35-7bca16479aa0